

四庫全書

史部

欽定四庫全書

史部

通典卷二十七至三十

詳校官侍郎_臣李封

編修_臣程嘉謨覆勘

覆校官助教_臣吳省蘭

校對官助教_臣金學詩

謄錄監生_臣魏溥耀

欽定四庫全書

通典卷二十七

唐 京兆杜佑 君卿 纂

職官九

諸卿下

內侍省

內侍

內常侍

內給事

內謁者監

內寺伯

掖庭局

宮闈局

奚官局

內僕局

內府局

天文有宦者四星在帝座之西周官有宮正宮伯

皆主王宮

中宮 宮人

掌王之六寢

內宰

理王內之政令以陰禮教六宮

閹人

掌守王宮

寺人

掌王之內人及女宮

戰國時有宦者令

趙有宦者令繆賢是

秦少府屬官有

中書謁者令丞又有將行衛尉少府各一人

並皇后鄉

漢景

帝中元六年改將行為大長秋

顏師古曰秋者收成之時長者恒久之義故以

為皇后官名

或用中人或用士人

中人閹人

成帝加置太僕一人

掌太后輿馬通謂之皇太后卿皆隨太后宮為官號在

正卿上無太后則闕

衛尉在衛尉上少府在少府上之類是也

又有長信詹

事掌皇太后宮景帝六年更名長信少府平帝元年更

名長樂少府帝祖母稱長信宮帝母稱長樂宮故有長
信少府長樂少府職如長秋位在長秋上及職吏皆宦
者也後漢常用宦者職掌奉宣中宮命凡給賜族親當
謁見者闕通之中宮出則從屬官有丞中宮僕謁者私
府署令初秦又置中常侍官參用士人皆銀璫左貂給
事殿省漢制置侍中中常侍各一人省尚書事黃門侍
郎一人傳發書奏皆用姓族後漢中常侍贊導內事顧
問應對永平中始定員數中常侍四人

漢舊儀曰秩千石得出入卧內

舉法省中省中即禁中也成帝外家王禁貴重朝中為諱禁曰省小黃門十人自明帝

以後員數稍增改以金璫右貂兼領卿署之職自和熹

太后以女主稱制不接公卿乃以閹人為常侍小黃門

通命兩宮自此以來悉用閹人不調他士自安迄桓權

任尤重手握王爵口含天憲桓帝既與宦官謀誅梁冀

乃封宦者五人

單超徐璜貝瑗左瑄唐衡也

同日為侯皆食邑故世

號五侯焉

宦者鄭眾字季產事和帝一心王室每策勲班賞辭多受少由是常與議事中官用權自

衆始也又明帝時中常侍蔡倫數犯顏匡劾又宦者曹騰歷常侍長秋封費亭侯用事省閹三十餘年奉事四

帝未嘗有過其所進達皆海內名人又有宦者奇音良
賀等皆清儉足以勸俗也楊秉為太尉奏請免中常侍
侯覽貝瑗等官尚書召對秉掾屬曰公府外職而劾近
官經典漢制有故事否秉使對曰春秋趙鞅以晉陽之
甲逐君側之惡又傳曰除君之惡惟力是視鄧通戲慢
中屠嘉召責文帝許之漢制故事三公之職無所不統
帝不得已遂免
覽官削瑗國

及袁紹大誅宦者之後永巷掖庭復用

士人間闡出入莫有禁切侍中侍郎門部駙宰中外雜
錯醜聲彰聞魏改漢制太后三卿在九卿下晉復舊在
同號卿上有后則置無后則闕齊鬱林王立文安太后
即尊號以宮名置宣德衛尉少府太僕梁有弘訓太后

亦置屬官陳亦有太后三卿後魏太長秋掌顧問應對

自文明馮后閤宦用事大者令僕小者卿守

宦者趙黑為選曹尚

書

北齊有中侍中省置中侍中二人中常侍四人掌出

入門閤又有長秋寺置卿中尹各一人掌諸宮閤領掖

庭等令並用宦者後周有司內上士小司內中士巷伯

中士等官隋曰內侍省領內侍內常侍等官

內侍即舊長秋內常

侍即舊中常侍

煬帝改內侍省為長秋監置令一人少令一人

丞二人並用士人餘用宦者領掖庭宮闈奚官三署亦

參用士人大唐武德初改為內侍省皆用宦者龍朔二

年改為內侍監咸亨元年復舊光宅元年改為司宮臺

神龍元年復舊有內侍四人

掌知宮內供奉中宮駕出則夾引總判局事舊二人

開元中加二人七年三月勅內侍五品以上許養一子仍以同姓者初養日不得過十歲

○內常侍

六人

通判局事

屬官有內給事八人內謁者監六人內寺伯

二人寺人六人領掖庭宮闈奚官內僕內府等五局

神龍

元年以後始以中使出監諸軍兵馬寶應元年五月勅諸道州所承上命須憑正勅可施行不得懸便信中使

宣勅即遵行

○內給事周禮內小臣之職掌王后之命后出

入前驅後漢少府有給事黃門常侍左右止在內宮門
通中外及中宮以下衆事自魏晉至於梁陳無其職後
魏有中給事中後改為中給事北齊中侍中省有中給
事中四人煬帝改為內承直大唐復為內給事置八人
○內謁者後漢大長秋屬官有中宮謁者二人主報中
章後魏北齊有中謁者僕射隋內侍省有內謁者監六
人內謁者十二人大唐因之○內寺伯周禮寺人掌王
之內人及女宮之戒令隋內侍省有內寺伯二人大唐

因之○掖庭局令秦置永巷漢武更名掖庭置令掌宮人簿帳公桑養蠶及女工等事後漢掖庭令掌後宮貴人采女又有永巷令典官婢皆宦者並屬少府大唐置二人○宮闈局令二人隋置令掌宮內門閤之禁及出納神主并內給使名帳糧廩事大唐因之○奚官局令二人齊梁陳隋有奚官署令掌守宮人使藥疾病罪罰喪葬等事大唐置二人○內僕局令二人後漢有中宮僕令掌車輿雜畜及導等大唐置二人○內府局令二

人漢有內者局令隋曰內者大唐為內府置令二人掌內庫出納帳設澡沐等

少府監

少監

丞

主簿

中尚

左尚

右尚

織

染

掌冶等署

暴室等丞

中尚

左尚

右尚

織

少府秦官漢因之是為九卿掌山海池澤之稅以給供

養

應劭曰山海池澤之稅名曰禁錢以給私養自別為藏少者小也故稱少府顏師古曰大司農供軍國之

用少府以養天子也天子曰少府諸侯曰私府漢時官有司府長掌禁錢後光武改屬司農也王莽曰共工

後漢少府卿一人掌中服御之諸物衣服寶貨珍膳之

屬朝賀則給壁

後漢東平王蒼為驃騎正月朔朝蒼當入賀故事少府給壁時陰就為少府貴

傲不奉法漏將盡而求璧不得蒼掾朱暉遙見少府主簿持璧乃往給曰試請覩之既得而馳奏之就復以他壁朝給音

徒改反

凡中書謁者尚書令僕射中常侍黃門御史

中丞以下皆屬焉

孔融字文舉以將作大匠為少府

晉制銀章青綬五

時朝服進賢兩梁冠絳朝服佩水蒼玉哀帝末省并丹

陽尹孝武復置宋少府領左右尚方御府東冶南冶平

準等令丞齊又加領左右銀鍛署梁少府為夏卿位視

尚書左右丞陳因之後魏少府謂之六卿

以少府宗正太僕廷尉司

農鴻臚為六卿

至孝文太和中易制官品遂改少府為太府北

齊無少府其尚方等署皆隸太府至隋煬帝大業五年又分太府爲少府監置監及少監復領尚方織染等署後又改監少監並爲令大唐武德初置軍器監廢少府監貞觀元年五月分太府中尚方織染坊掌冶坊署置

少府監龍朔二年改爲內府監咸亨元年復舊光宅元年改爲尚方監神龍元年復舊監一人

總判

少監二人

通判

初少監一人太極元年加一人領中尚左尚右尚織染掌冶等五署

開元

十年五月於北都置軍器監至二十六年五月廢

○丞漢有六人後漢省五而

有一丞其後歷代皆一人

山公啟事曰中郎衛昱往為少府丞其後損益

大唐

置四人○主簿晉置二人自後歷代一人大唐有二人

○中尚署周官為王府秦置尚方令漢因之後漢掌上

手工作御刀劍玩好器物及寶玉作器

官者蔡倫為尚方令監作祕劍

及諸器械莫不精工堅密為後代法

兩漢又有考工令主作兵器其職稍

同

考工令作兵器兵器成則傳執金吾入武庫及主織絲諸雜工初屬少府中屬主爵光武時屬太僕

漢

末分尚方為中左右三尚方魏晉因之自過江唯置一

尚方哀帝以隸丹陽尹宋武帝踐祚以相府作部配臺

謂之左尚方而本署謂之右尚方並掌造軍器又以相

府細作配臺即其名置令一人隸門下孝武大明中改

曰御府

御府二漢已有之典官婢作藝衣服補浣之事魏晉猶置其職江左乃省焉

後廢帝

初省御府置中署隸右尚方則漢之考工令如宋之尚

方令尚方令如宋中署矣齊置左右尚方令各一人梁

有中左右尚方北齊亦有三尚方隸太府隋煬帝分隸

少府大唐省方字有中左右三尚署令丞各一人

中署掌宮

內營造雜作左署掌車輦織扇膠漆畫鏤等作右署掌皮毛膠墨雜作席薦等事開元以後別置中尚使以監

之
○織染署令一人周禮天官典絲掌受文織絲組焉

染人掌染線帛秦置平準令

韋昭釋名曰平準令主染色染有均平之法故準而

則漢因之及主物價練染初少府屬官有東織西織成

帝省東織更名西織爲織室北齊中尚方領涇州雍州

絲局定州紬綾局丞後周有司織下大夫隋有司織司

染二署煬帝合爲織染一署令掌織絰組綬綾錦冠幘

并染色等大唐因之有令丞○掌冶署秦及漢郡國有

鐵官

諸郡國出鐵者置鐵官長丞

晉冶令掌工徒鼓鑄隸衛尉江左

以來省衛尉始隸少府宋有東治南治各置令丞

東治令丞

各一人南治令丞各一人

而屬少府齊因之江南諸郡縣有鐵者或

置治令或置治丞多是吳所置梁陳有東西治

東治重西治輕

其西治即宋齊之南治

北齊諸治屬太府後周有冶工鐵工中士

隋有掌冶署令丞大唐於京師置冶署有令丞各一人

掌造鑄金銀銅鐵塗飾琉璃玉作等事○暴室丞

後漢暴室

丞宦者也主中婦人疾病者就此室理之其

海丞

漢平帝置

少府海丞一人掌海稅後無

果丞

與海丞同置掌諸果實後無

將作監

丞

主簿
中校署

左校署
東園主章令

右校署

甄官署

今將作亦少皞氏以五雉為五工正以利器用

雉有五種故曰

五雉

唐虞共工周官考工之官蓋其職也秦有將作少府

掌治宮室漢景帝中元六年更名將作大匠後漢位次

河南尹中元二年省以謁者領之章帝建初元年復置

初以任隗為之掌修作宗廟路寢宮室陵園木土之功

并樹桐梓之類列於道側

後漢志注曰古者列樹以表道續漢書曰李固字子堅遷

大匠常推賢貢士孔融

魏晉因之江左至宋齊皆有事

則置無事則省而梁改爲大匠卿陳因之後魏亦有之

北齊有將作寺其官曰大匠

兼領功曹主簿長史司馬等官屬

後周有

匠師中大夫掌城郭宮室之制又有司木中大夫掌木

工之政令隋與北齊同至開皇二十年改寺為監大匠

為大監初加置副監煬帝改大監少監為大匠少匠五

年又改為大監少監十三年又改大令少令大唐復皆

為匠龍朔二年改將作為繕工監

大匠少匠
隨監名改

咸亨元年

復舊光宅元年改為營繕監神龍元年復舊大匠一人

總判

少匠二人

通判初一人太極元年加置一人

天寶中改大匠為大監

少匠為少監領左校右校甄官中校四署○丞漢有二
人後漢一人魏晉因之東晉以後有事則置無事則省
梁又置一人陳因之後魏有之北齊四人後周曰匠師
中士隋二人大唐四人○主簿晉置自後與丞同隋二

人大唐因之○左右校署秦及漢初有左右前後中五

校令後唯置左右校令後漢因之掌左右工徒

後漢度尚自右

校令擢拜

魏併左校右校於材官晉左右校屬少府宋

以後並有左校令丞北齊亦有之隋左右校令丞屬將

作大唐因之○左校署令丞二人

掌營構木作
採材等事

右校署

令丞二人

掌營土作瓦泥并
燒石灰厠溷等事

甄官署令丞一人後漢有

前後中甄官令屬將作晉有甄官署掌磚瓦之事宋齊

北齊隋悉有之大唐因之掌營磚石瓷瓦○中校署令

秦漢有自後無大唐置令丞各一人掌舟車雜兵仗廐

牧○東園主章令

漢有之武帝更名木工如淳曰章謂
木材也舊將作大匠主材史名章曹

掾顏師古曰今所謂木鍾者蓋聲之轉耳東園主章掌
材以供東園匠東園匠官名主作陵內器物屬少府

大唐無

國子監

祭酒 司業 丞 主簿 國子博士

助教 太學

廣文 四門 律學

書

學

算學等博士

孫卿在齊爲三老稱祭酒

胡廣曰凡官名祭酒皆一位之元長古者賓得主人饌則

老者一人舉酒以祭地故以祭酒爲稱漢之侍中魏之散騎常侍功高者並爲祭酒用其義也公府有祭酒亦

因其名

漢吳王濞年老不朝爲劉氏祭酒則祭酒之名久

矣

王莽以安車駟馬迎夏侯勝爲講學祭酒勝推而不受

又漢置博士至東京凡

十四人而聰明有威重者一人爲祭酒謂之博士祭酒

蓋本曰僕射中興轉為祭酒

昭帝增博士弟子員滿百人宣帝末增倍之元帝時

詔能通一經者皆復數年郡國置五經百石卒史成帝末增弟子員三千人平帝時王莽增元士之子得受業如弟子勿以為員歲課甲科四十人為郎中乙科二十人為太子舍人丙科四十人補文學掌故後漢安帝薄於藝文博士倚席不講學舍額弊鞠為園蔬牧兒芻豎至於薪刈其下順帝感翟酺之言乃更脩黌宇凡所構二百四十房千八百五十室試明經下第補弟子增甲乙之科員各十人餘郡國諸儒皆補郎舍人魏因

之晉武帝咸寧四年初立國子學置國子祭酒一人

永嘉

中又置儒林祭酒以杜夷為之

國子周之舊名周官有師氏之職即魏

國子祭酒

周禮師氏以三德三行教國子又有保氏而養國子以道教之六藝也

晉介犢

阜朝服進賢兩梁冠佩水蒼玉舊視侍中列曹尚書

劉毅

稽紹並為此官又袁瓌字山甫爲國子祭酒時屢經喪亂禮敎陵遲瓌上疏求立學徒帝從之國學之興自瓌始也又裴頠爲祭酒奏立太學起講堂築門刻石寫五經也宋代不置學則助教唯

置一人而祭酒博士常置也明帝太始六年以國學廢

初置總明觀祭酒一人有玄儒文史四科科置學士各

十人齊高帝建元四年有司奏置國學祭酒准諸曹尚

書博士准中書郎助教淮南臺御史選經學爲先若其

人難備給事中以還明經者以本位領其後國諱廢學

永明三年立學尚書令王儉領祭酒學既建乃省總明
觀八年國子博士何胤單為祭酒疑所服陸澄等皆不
能據遂以玄服臨試月餘日博議定乃服朱衣齊梁號

為國師

梁王承安期為國子祭酒承祖儉父暕並居
此職三代為國師前代未有當時以為榮暕音

簡陳後魏亦曰國子祭酒其初定中原先立太學置五

經博士北齊國子寺有祭酒一人隋開皇十三年國子

寺罷隸太常

凡國學諸官自漢以下
並屬太常至隋始革之

又改寺為學仁壽

元年罷國子學唯立太學一所省國子祭酒博士置太

學博士總知學事煬帝即位改國子學爲國子監依舊

置祭酒大唐因之

龍朔元年東都亦置

龍朔二年改爲司成館又

改祭酒爲大司成咸亨初復舊光宅元年改國子監爲

成均監神龍元年復舊領國子學

學生三百人

太學

學生五百人

四門

學生五百人俊士八百人

律學

學生五十人

書學

學生三十人

算學

學生三十人

人凡六學生徒二千二百一十人每學各置博士以總學事及有助教等員天寶九載又於國子監置廣文館領學生爲進士業者置博士助教各一人品秩與太學同置祭酒一人掌監學之政

皇太子受業則執經講說以儒學優重者爲之天寶九

載置廣文館學生進士○國子司業煬帝大業三年於
國子監初置司業一人禮曰樂正司業父師司成因以
爲名大唐置二人副貳祭酒通判監事龍朔二年改爲
少司成咸亨初復舊凡祭酒司業皆儒重之官非其人
不居○承隋置三人大唐一人○主簿北齊置隋一人
大唐因之○國子博士班固云按六國時往往有博士

掌通古今

又曰博士秦官漢因之

漢博士多至數十人冠兩梁

文帝

時博士朝服
玄端章甫冠

武帝建元五年初置五經博士宣帝成帝

之代五經家法稍增置博士一人博士選有三科高第
爲尚書次爲刺史其不通政事以久次補諸侯太傅於

時孔光爲博士數使錄冤獄行風俗以高第爲尚書

叔孫

通爲博士初制漢禮又賈誼年二十餘文帝召爲博士
年最少每有詔議下諸老生未能言誼盡爲對之人人
各如其意又元鼎中徐偃爲博士使行風俗偃矯制使
膠東魯國鼓鑄鹽鐵還奏事張湯劾偃以矯制法至死
偃以春秋之義大夫出疆有可以安社稷利萬人專之
可也湯不能誦又公孫弘董仲舒朱雲匡衡疏廣韋賢
張禹並後漢博士凡十四人

易施孟梁丘京氏尚書歐陽大小夏侯詩齊魯韓氏

禮大小戴春秋嚴顏各一博士華嶠漢書曰初欲立左
氏傳博士范升以爲左氏淺末不宜立陳元聞之乃詣

闕上疏爭之更相辯對凡十餘上帝卒立左氏學

掌以五經教子弟國有疑事

掌丞問對舊時從議郎爲博士其通獻異藝入平尚書

出部刺史諸侯守相久次轉諫議大夫中興高第爲侍

中小郡若都尉博士限年五十

其督郵板狀曰生事愛敬喪沒如禮理易尚書

孝經論語兼崇載籍窮微闡奧師事某官經明受謝見授門徒尚五十人以上正席謝坐三郡二人隱居樂道不求聞達身無金瘡痼疾三十六屬不與妖惡交通王侯賞賜行應四科經任博士下言某官某甲保舉順帝

諱保故稱守

安帝以博士多非其人詔命三公將軍中二千

石舉博士各一人務得經明行高卓爾茂異是時羣僚

承風凡所旌賞綽有餘裕後旋復故遂用陵遲初平帝

元始四年改博士爲博士師後漢兼而存之並擇儒者

桓榮魯恭戴憑等並爲博士

魏及西晉朝博士置十九人

魏樂祥字文載拜博

士於時太學初立有博士十餘人其學多偏不取親教備員而已唯祥五經業並授武帝咸寧四

年初立國子學置國子博士一人皆取履行精淳通明

典義若散騎常侍中書侍郎太子中庶子以上乃得召

試

元帝時荀崧上疏曰昔咸寧太康永嘉之中侍中常侍黃門通洽古今行爲世表者領國子博士

宋

齊諸博士皆阜朝服進賢兩梁冠佩水蒼玉梁國學有

博士二人天監四年置五經博士各一人

魏晉宋齊並不置五經博

士至此始置焉舊國子學生限以貴賤武帝欲招來後進五館

生皆引寒門雋才不限人數陳因之後魏北齊並有之

後魏崔逸爲國子博士每公事逸常被詔獨進博士特命自逸始也隋仁壽元年省國子

博士大業三年復置一人大唐增置二人龍朔二年改

爲司成宣業咸亨初復舊諸州府亦有經學博士一人

○助教晉咸寧四年初立國子學置助教十五人以教

生徒江左及宋並十人

宋制易尚書毛詩禮記周禮儀禮左傳公羊穀梁各爲一經論

語考經爲一經合
十經助教分掌

宋齊並同梁國子助教舊視南臺御

史品服與博士同陳因之後魏亦有北齊置十人隋置

四人大唐國子學助教三人諸府州縣各有助教員

府州

二人縣一人
學生各有差

○太學博士晉江左增置國子博士十六

人謂之太學博士品服同國子博士梁置太學博士八

人陳因之後魏亦然北齊國子寺有太學博士十人後

周置太學博士下大夫六人隋初置太學博士五人仁

壽元年罷國子唯立太學置博士五人大業三年減置

二人大唐因之助教後魏置北齊亦有之置二十人後
周曰太學助教上士隋又曰太學助教五人大業三年
減三人大唐因之○廣文館博士一人助教一人並以
文士爲之大唐天寶九載置○四門博士後魏書劉芳
表云太和二十年立四門博士於四門置學按禮記曰
天子設四學鄭玄注曰四郊之虞庠也今以其遼遠故
置於四門請移與太學同處從之北齊二十人隋五人
大唐三人助教北齊國子寺有二十人隋初則五人大

唐因之直講四人大唐初置無員數長安四年始定爲四員大成二十人大唐置取貢舉及第人簡聰明者試書日誦得一千言并日試策所習業等十條通七然後補充仍散官祿俸賜會同直官例給武太后長安中省而置直講定爲四員○律學博士晉置屬廷尉衛覲奏請律學博士轉相教授東晉以下因之梁曰胄子律博士屬廷尉陳亦有律博士後魏北齊並有之隋大理寺官屬有律博士八人大唐因之而置一人移屬國學助

教一人從九品上○書學博士大唐置三人又置典學

二人

貞觀六年正月命整治御府古今工書鍾王等真跡得千五百一十卷太宗嘗謂侍中魏徵曰虞世

南死後無人可與論書徵曰褚遂良下筆道勁甚得王逸少體太宗即日召令侍讀嘗以金帛購求王羲之書

蹟天下爭貴古書詣闕以獻當時莫能辯其真偽遂良備論所出一無舛誤武太后神功元年謂鳳閣侍郎王

方慶曰卿家多書舍有右軍遺跡對曰臣十代再從伯祖羲之書先有四十餘紙往貞觀十二年太宗購求先

並以進訖臣十一代祖導十代祖洽九代祖珣八代祖曇首七代祖僧綽六代祖仲寶五代祖騫高祖規曾祖

褒并九代三從伯祖晉中書令獻之以下二十八人書共十卷今進上太后御武成殿示羣臣仍令中書舍人

崔融為寶章集以叙其事復賜方慶當時以為榮

○算學博士二人典學二人

軍器監

丞

主簿

甲坊署

弩坊署

後周武帝四年初置軍器監大唐武德初置軍器監貞觀元年罷軍器大監置少監後省之以其地隸少府監爲甲弩坊開元初復以其地置軍器使至三年以使爲監更置少監一員丞二員主簿一員錄事一員及弩坊等署十一年悉罷之復隸少府爲甲弩坊十六年移其名於北都置軍器監

亦嘗以太原尹兼領

天寶六載復於舊所置

軍器監監一人領甲坊弩坊兩署○丞主簿各一人大

唐置○甲坊署令丞周禮考工記曰函人爲甲隋少府有甲鎧署大唐改焉○弩坊署令丞周禮司弓矢掌四弩隋有弓弩署大唐改焉

都水使者

丞

主簿

舟楫署

河渠署

虞舜命益作虞以掌山澤周官有林衡川衡二官掌林麓川澤之禁漢武帝元鼎二年初置水衡都尉

顏師古曰山林

之官曰衡掌諸池苑故稱水衡張晏曰主都水及林苑故曰水衡主諸官故曰都有卒徒武事故曰尉衡平也

主平其稅也

掌上林苑

漢趙充國以中郎爲水衡都尉主船官也

蓋主上林離宮

燕休之處

王莽改曰予虞

後漢光武省之并其職於少府每立

秋疆劉之日輒暫置水衡都尉

疆劉將祭大獵之名疆勅俱反

事訖省

初秦漢又有都水長丞主陂池灌溉保守河渠自太常

少府及三輔等皆有其官漢武帝以都水官多乃置左

右使者以領之

劉向爲左都水使者是也又續漢百官志曰劉向領三輔都水

至漢哀

帝省使者官至東京凡都水皆罷之并置河隄謁者漢

之水衡都尉本主上林苑魏世主天下水軍舟船器械

晉武帝省水衡置都水臺有使者一人掌舟航及運部

而河隄爲都水官屬元康中復有水衡都尉

元康百官名及晉起

居注曰陳愼戴熊俱以都水使者領水衡都尉

懷帝永嘉六年胡賊入洛陽都

水使者奚濬先出督運得免江左省河隄

諸公贊曰陳賜字太和有

巧思爲都水使者洛陽記云千金隄賜所置

宋都水使者銅印墨綬進賢兩

梁冠與御史中丞同孝武帝初省都水臺罷都水使者

置水衡令孝建元年復置齊有都水臺使者一人梁初

與齊同天監七年改都水使者爲大舟卿位視中書郎

列卿之最末者主舟航河隄陳因之後魏初皆有水衡

都尉及河隄謁者都水使者官至永平二年都水臺依舊置二使者北齊亦置二使者隋開皇二年廢都水臺入司農十三年復置仁壽元年改臺爲監更名使者亦爲監煬帝又改爲使者尋又爲監加置少監又改監及少監並爲令領舟楫河渠二署大唐武德八年置都水臺後復爲都水署置令隸將作員觀中復爲都水監置使者龍朔二年改都水使者爲司津監永咸亨元年復舊光宅元年改都水監爲水衡置都尉神龍元年復爲

都水監置使者二人分總其事不屬將作領舟楫河渠
二署○丞漢有水衡丞五人亦有都水丞後漢晉初都
水使者有叅軍二人蓋亦丞之職任宋因之梁大舟卿
有丞陳因之後魏北齊又曰叅軍隋曰都水丞大唐二
人○主簿晉水衡都尉有之爲左右前後中五水衡令
悉皆有之梁大舟卿亦有之至隋又置大唐因之○舟
楫署令漢主爵中尉屬官有都船令丞水衡都尉有楫
權令丞晉曰船曹吏齊曰官船典軍後周曰舟中士隋

爲舟楫署令丞大唐因之令丞各一人○河渠署隋煬
帝置令丞各一人大唐因之

通典卷二十七

欽定四庫全書

通典卷二十八

唐 京兆杜佑君卿纂

職官十

武官上

將軍總叙

三代之制天子六軍其將皆命卿

一萬二千五百人爲軍

故夏書

曰大戰於甘乃召六卿蓋古之天子寄軍政於六卿居

則以田警則以戰所謂入使理之出使長之之義其職在國則以比長閭胥族師黨正州長鄉大夫爲稱其在軍則以卒伍司馬將軍爲號所以異軍國之名諸侯之制大國三軍次國二軍小國一軍其將亦命卿也晉獻公初作二軍公將上軍則將軍之名起於此也魏獻子

衛文子並居將軍之號

左傳曰晉閻沒女寬謂魏獻子曰豈將軍食之而有不足注曰

獻子爲中軍率故謂之將軍又禮記曰將軍文子之喪既除而後越人來弔又家語曰衛將軍文子問於子貢是也文子爲衛之將軍名彌牟自戰國置大將軍周末又置前後左右

將軍至秦將軍之言多矣漢興置大將軍驃騎將軍位

次丞相車騎將軍衛將軍左右前後將軍皆金印紫綬

位次上卿

後漢志曰漢將軍比公者四謂大將軍驃騎車騎衛將軍

掌京師兵衛四

夷屯警孝武征閩越東甌又有伏波樓船及伐朝鮮大

宛復置橫海度遼貳師宣帝增以蒲類破羌權時之制

若此非一亦不常設光武中興諸將軍皆稱大及天下

已定武官悉省

後漢志曰其前後雜號將軍皆主征伐事訖皆罷

四征興於漢

代四安起於魏初四鎮通於柔遠

鎮東西南並後漢未有之鎮北魏置

四

平止於喪亂

魏置

晉武帝重兵官故軍校多選朝廷清重

之士居之置中軍將軍以統宿衛七軍及五王作難東
海王越以頃興事皆由殿省乃奏宿衛有侯爵者皆罷
之時殿中武官並封侯由是出者畧盡皆涕泣而去乃
以東海國官領左右衛以國兵宿衛晉宋以來以領軍
護軍左右二衛驍騎游擊將軍謂之六軍

宋輿服志曰
驍騎車騎衛

將軍及諸將軍加大者皆金章紫綬武冠
佩水蒼玉諸軍司馬銀章青綬朝服武冠

其四安四平

左右前後征虜等將軍及四中郎將晉代荀羨王胡之

並居此官宋齊以來惟處諸王素族無爲者齊以二衛

左四軍

前後左右將軍謂之四軍也

五校

即漢之五校

驍騎游擊積射強

弩殿中員外殿中武衛七將軍殿中司馬左右及虎賁

之中郎將冗從僕射

宋志曰冗從僕射漢東京有中黃門冗從僕射非其職也魏代因其

名而置冗從僕射職官要錄曰本期門之職漢桓帝時置冗從僕射掌諸散從其射事則主帥之

羽林

監武騎常侍謂之西省而散騎爲東省梁武帝以將軍

之名高下舛雜命更加釐定於是有司奏置一百二十

五號將軍以鎮衛驃騎車騎爲二十四班

內外通用

四征四

中爲二十三班

四中謂軍衛撫權

八鎮爲二十二班

東西南北左右前後

八安爲二十一班

東西南北左右前後

四平四翊爲二十班

四平東西

南北四翊左右前後

凡三十六號爲重號將軍又有五德將軍

忠勇

軍師武臣爪牙龍騎雲麾鎮兵翊師宣惠果毅智威仁威勇威信威嚴威智武仁武勇武信武嚴武謂五德將

軍

以班多者爲貴凡十品二十四班品十取其盈數班

二十四以法氣序制簿悉以大號居後以爲選法自小

遷大也前史所記以位得從公故將軍之名次於台槐

之下至是備其班品敘於百官之外凡一百二十五將

軍後魏將軍之名多矣謂驃騎車騎衛爲三將軍末年

有八柱國大將軍其中六人各督二大將軍

事在柱國將軍篇

凡十二大將軍

元贊元育元廓侯莫陳順宇文遵達奚武李遠豆盧寧宇文貴賀蘭祥楊忠王

雄此十二大將軍

又各分統開府一人一開府領一軍兵是爲

二十四軍分掌禁旅當爪牙禦侮之寄自大統十六年

以後功臣位至柱國及大將軍者衆矣咸是散秩無復

統禦

後周武帝三年改諸軍軍士並爲侍官

隋煬帝以左右衛

隋初舊名

左右

屯衛

改左右領軍爲之

左右禦衛

新加

左右候衛

改左右武候爲之

凡

十二衛各置大將軍一人將軍二人以總府事

每衛各置長史

錄事參軍司倉兵騎鎧等
參軍員軍人總名衛士

蓋魏周十二大將軍之遺制

大唐武德初秦王既平王世充及竇建德高祖以秦王

功殊今古自昔位號不足以爲稱乃特置天策上將軍

以拜馬位在王公上及升儲宮遂廢天策府二年七月

高祖以天下未定事資武力將舉關中之衆以臨四方

乃置十二軍分關中諸府以隸焉

以萬年道爲參旗軍
長安道爲鼓旗軍富

平道爲玄戈軍醴泉道爲丹鉞軍同州道爲羽林軍華
州道爲騎官軍寧州道爲折威軍岐州道爲平道軍幽

州道爲招搖軍麟州道爲苑遊軍涇州道爲天紀軍宜州道爲天節軍

每軍將一人副一

人取威名素重者爲之

楊恭仁劉弘基長孫順德等並爲其將

督耕戰之

備自是士馬強勁無敵於天下五年省七年以突厥寇

掠復置十二軍後又省之其後定制有左右衛

隋之翊衛

左

右驍左右武左右威

左右威隋之屯衛

左右領軍左右金吾

金

隋之武候衛

左右監門左右千牛凡十六衛大將軍各一人

左右衛及左右金吾總謂之四衛其餘謂之雜衛

將軍總三十人

左右千牛衛將軍各一人

餘衛各二人

左右羽林左右龍武左右神武六軍大將軍各

一人將軍各三人皆有衛署

開元十二年張說奏於三輔揀五尺八兵十二萬人

謂之驍騎置於南衙每月分番自此以後不復簡點其餘驃騎輔國鎮軍冠軍四

大將軍雲麾勇武壯武宣威明威定遠寧遠游騎游擊

等九將軍並爲五品以上武散官先天二年正月十日

勅往者衛士計戶取充使二十一入幕六十出軍既憚

劬勞咸欲避匿今改取二十五以上充十五年即放出

頻經征鎮者十年放出自今以後羽林飛騎先於衛士

中簡擇開元十一年二月勅同華兩州精兵所出地資

輦轂不合外支自今以後更不得取同華兩州兵防

左右衛 并親衛

漢京師有南北軍掌理禁衛

南軍若今諸衛北軍若今羽林等軍周勃馳入北軍

是也初有衛將軍

說在本篇

魏末晉文王又置中衛將軍武帝

受禪分中衛爲左右衛將軍

以羊琇爲左趙序爲右

並置佐吏皆

掌宿衛營兵銀章青綬武冠絳朝服佩水蒼玉宋齊謂

之二衛各領營兵每幕一人宿直後增二衛儀從爲九

十人陳因之後魏永光初又增置左右衛將軍各二人

北齊二人分掌左右廂所主朱華閣以外各武衛將軍

二人貳之隋初左右衛大將軍各一人將軍各二人又

各統親衛煬帝改左右衛為左右翊衛

又加置親衛并領勳武三衛煬

帝改三衛為三侍非翊衛府皆無三侍

其所領軍士名為驍騎大唐復為

左右衛大將軍各一人

掌宮掖禁禦督攝隊伍

將軍各二人

貳大將軍

事

○長史各一人晉武帝置左右衛各有長史司馬東

晉省長史歷宋齊梁陳後魏北齊並同至隋左右衛各

置長史一人大唐因之○錄事參軍各一人東晉元帝

初爲鎮東大將軍置錄事參軍自後無聞梁皇弟皇子
府有中錄事叅軍及錄事叅軍各一人後魏二大公府
及第一第二第三品將軍府及始蕃王二蕃王三蕃王
府各有錄事參軍官北齊因之隋左右衛府各有錄事
參軍一人大唐因之○倉曹叅軍各二人東晉元帝爲
鎮東大將軍有倉曹叅軍宋武帝相府亦置後魏與錄
事叅軍同置北齊因之隋左右衛府各有倉曹叅軍一
人大唐因之置二人○兵曹叅軍各二人歷代皆與倉

曹同置○騎曹叅軍各一人魏司馬景王爲大將軍有騎兵宋武帝爲相有騎兵叅軍隋左右衛府有騎兵叅軍大唐初因之其後改爲騎曹○冑曹叅軍各一人東晉元帝爲鎮東大將軍有鎧曹叅軍宋武帝爲相亦有之齊有左右鎧曹各一人隋左右衛府有鎧曹行叅軍事一人大唐因之長安初改爲冑曹神龍初復爲鎧曹開元初復爲冑曹凡自十六衛及東宮十率府錄事及兵倉騎冑等曹叅軍通謂之衛佐並爲美職漢魏以來

諸將軍有長史以下官屬今諸衛所置蓋亦因其舊號

考其資位則全校微矣其下諸衛官屬並同○左右親

衛中郎將府中郎將之名秦漢以來有之非今任也

別具

中郎將五官
左右篇中

今中郎將因隋每衛各置開府一員以統

之大唐武德七年改開府爲中郎將親衛爲一府勳衛

翊衛各爲一府中郎將各一人掌領校尉以下宿衛總

判府事大唐武德七年改親衛驃騎將軍爲之其勳翊

二衛亦然左右郎將一人隋備身府置左右郎將大唐

因其名武德七年改親衛車騎將軍爲之其勲翊二衛亦然掌二中郎將之職錄事叅軍一人掌受府事兵曹叅軍一人掌判府事校尉五人

左右驍衛

漢有驍衛將軍謂之雜號將軍武帝以李廣爲之後省後漢初改屯衛爲驍騎魏置爲中軍晉領營兵兼統宿衛梁以來其任愈重天監六年置左右驍騎領朱衣直閤並給儀從北徐州刺史昌義之首爲此職出則羽儀

清道入則與二衛通直臨軒則升殿夾侍改舊驍騎曰

雲騎陳有左右驍騎及雲騎

陳韋翹爲驍騎將軍素有名稱每大事恒令夾侍左

右時人榮之

永定二年詔云左右驍騎宜通文武文官則用

心腹武官則用功臣所給儀從同太子二衛率後魏北

齊並有驍騎將軍之職後周有左右驍騎率上士至隋

開皇十八年置備身府煬帝即位改左右備身府爲左

右驍衛府所領軍士名曰豹騎其備身府又別置焉大

唐因隋置左右驍衛府龍朔二年去府字光宅元年改

左右驍衛爲左右武威神龍元年復舊大將軍各一人

所掌與左右衛同將軍各二人以副之

領官屬並隋置
大唐因之同左

右衛

左右武衛

後漢末曹公爲丞相有武衛營及魏文帝乃置武衛將軍以主禁旅晉宋齊梁陳隋又有建武奮武廣武等將軍至隋採諸武之名置左右武衛大將軍一人將軍各二人以總府事煬帝改所領軍士名熊騎大唐光宅元

年改爲左右鷹揚衛神龍元年復爲武衛其制與隋同

所掌如左右衛

領官屬並隋置大唐因之同左右衛

左右威衛

隋初有領軍府煬帝改爲左右屯衛大唐因之貞觀十

二年左右屯衛始置飛騎出遊幸即衣五色袍乘六閑

馬賜猛獸衣韉而從馬龍朔二年改左右屯衛爲左右

威衛而別置左右屯營亦有大將軍等官

尋改左右屯營爲羽林

光宅元年改威衛爲豹韜衛神龍元年復舊所掌如左

右衛

領官屬並隋置大唐因之同左右衛龍朔二年左右威衛舊官之員外各置錄事參軍一人府三人

史四人並隸左右羽林軍統本司事

左右領軍衛

初魏武爲漢丞相相府自置領軍非漢官也建安十二

年改爲中領軍以史渙爲之與護軍韓浩皆領禁兵文

帝受漢禪始置領軍將軍主五校中壘武衛三營

魏文帝踐

祚始置領軍將軍以曹休爲之

晉武帝初省使中軍將軍羊祜統二衛

前後左右驍騎七軍營兵即領軍之任也祜遷罷復置

北軍中候懷帝永嘉中改中軍曰中領軍元帝永昌元年復改曰北軍中候尋復爲領軍成帝時復以爲中候而陶侃居之尋復爲領軍魏晉領護皆金章紫綬中領

中護銀章青綬武冠絳朝服佩水蒼玉

晉郗鑒庾亮紀瞻卞壺陸曄褚

翼王彪之會稽王道子沈嘉武陵王導孔安國謝鯤等並爲領軍

宋置領軍將軍一人

掌內軍護軍將軍一人掌外軍齊有領軍及中領軍凡爲中小輕同一官也諸爲將軍官皆敬護諸王爲將軍相逢則領護讓道領軍置長史以下官屬梁領軍將軍

管天下兵要謂之禁司與左右僕射爲一流中領軍與

吏部尚書爲一流

梁蕭景爲領軍將軍管天下兵要監局官僚皆近倖多驕侈景在職峻切

官曹肅然其監局多事唯景及臧盾長於撥繁繼居此職並著聲稱

陳因之後魏有領軍

護軍

二職若侍臣帶者加中

又有領軍將軍護軍將軍二軍與領

護不並置北齊領軍府凡禁衛官皆主之以高歸彥爲

領軍大將軍領軍加大自歸彥始隋有左右領軍府各

掌十二軍籍帳差科辭訟之事不置將軍唯有長史司

馬諸曹掾屬等官煬帝改領軍爲左右屯衛

即今左右威衛大

唐復採舊名別置領軍衛分爲左右龍朔二年改爲左右戎衛咸亨元年復舊光宅元年改爲左右玉鈴衛神龍元年復舊各置大將軍一人掌宮掖禁備督攝隊伍與左右諸衛同將軍各二人以副之

長史齊梁陳並有之北齊有長史司

馬隋置錄事以下諸曹大唐因之同左右衛

左右金吾衛

秦有中尉掌徼循京師

如淳曰所謂游徼徼徼循禁備盜賊也顏師古曰徼謂遮繞音工

鈞反漢武帝太初元年更名執金吾

應劭曰吾者禦也掌執金革以禦非常顏

師古曰金吾鳥名也主辟不祥天子出職主
先導以禦非常故執此鳥之象因以名官
緹騎二百

人緹騎無秩比史食俸五百二十人輿服導從光生滿路羣僚之

中斯最壯矣光武徵時數曰仕宦常爲執金吾舊掌京師盜賊考按疑

事郅都甯成王溫舒減宣等皆截理橫噬虎而冠者也

一切理辨亦旋誅黜郅都爲中尉見者側目號爲蒼鷹後漢掌宮外戒

司非常水火之事衛尉巡行宮中金吾徵巡宮外相爲表裏以擒姦討猾月三繞

行宮外及主兵器自中興但專徼循不與他政魏武秉

政復爲中尉晉初罷直至後周置武環率武侯率下大

夫各二人隋置左右武侯府大將軍一人將軍三人掌

車駕出入先驅後殿晝巡夜察執捕姦非烽候道路水

草所宜巡狩師田則掌其營禁煬帝大業三年改爲左

右武侯衛所領軍士名欽飛

漢百官表曰漢有左弋令武帝太初元年更名欽飛

掌弋射屬少府光武省之隋氏採舊名

大唐又爲左右武侯府龍朔二年

改爲左右金吾衛置大將軍一人所掌與隋同將軍二

人副其事

領官屬並隋置大唐因之

左右監門衛

隋初有左右監門府將軍各一人掌宮殿門禁及守衛

事各置郎將二人校尉直長各三十人

有長史司馬錄事及倉兵二曹

泰軍鎧曹行泰軍各一人二漢有城門校尉掌京師城門屯兵非今任也

煬帝改將軍爲郎

將各一人正四品置官屬並同備身府大唐左右監門

府置大將軍中郎將等官龍朔二年改府爲衛大將軍

各一人所掌與隋同將軍各二人以副之中郎將各四

人分掌諸門以時巡檢

領官屬並隋置大唐因之

左右千牛衛

千牛刀名後漢有千牛備身掌執御刀因以名職

謝綽宋拾

遺有千牛刀即人君防身刀也齊尚書楊玉夫取千牛刀殺蒼梧王是也其義蓋取莊子云庖丁為文惠君解牛十九年所割者數千牛而刀刃若新發於硎因以為備身刀名北齊千牛備身屬左

右將軍隋有左右領左右府大將軍一人將軍二人掌

侍衛左右供御兵仗領千牛備身十二人掌執千牛刀

備身左右十二人掌供御刀箭備身十六人掌宿衛侍

從

左右置長史司馬錄事參軍及倉兵二曹參軍事鎧曹行參軍

煬帝改左右領左右

府為左右備身府置備身郎將等官大唐貞觀中復為

左右領左右府顯慶五年始置左右千牛府龍朔二年

改左右千牛府爲左右奉宸衛後改爲左右千牛衛神

龍二年各置大將軍一人

初以安國相王爲千牛衛大將軍是時王以常登帝位

所掌與隋同總判衛事將軍各一人以副之中郎將各

一人通判衛事

領官屬即隋左右領左右府長史以下大唐改之

左右千牛備

身各十二人

龍朔中改爲左右奉裕咸亨初復舊垂拱二年又改爲奉裕神龍元年復舊

掌

執御刀宿衛侍從

皆以高蔭子弟年少姿容美麗者補之花鈿繡服衣綠執象爲貴胄起家

之良選

備身左右十二人

執御刀弓箭宿衛侍省

備身各一百人

掌宿

衛侍
從

左右羽林衛

漢武太初元年初置建章營騎後更名羽林騎言其爲
國羽翼如林之盛

顏師古曰如羽之疾如林之多
一云象天文羽林星主車騎也宣帝

令中郎將騎都尉監羽林謂之羽林中郎將領郎百人
謂之羽林郎選隴西漢陽安定北地西河上郡良家子
便弓馬者以爲之一名巖郎言其禦侮巖除之下

後漢志曰

言從遊獵還宿殿階巖下室中故號
巖郎或說爲巖郎取其巖屬素整也

又置羽林左右監

後漢志曰羽林左監一人主羽林左騎
羽林右監一人主羽林右騎皆六百石
取從軍死事之

子孫養之羽林官教以五兵號曰羽林孤兒
五兵謂弓矢戈矛戈

光武中興以所征伐士勞苦者爲之其後復簡五營高

手別爲左右監羽林父死子繼與虎賁同所居之署謂

之寺
延熹六年減虎賁羽林住寺不任事者半俸 二漢並屬光祿勳
後漢實固鄧彪

並爲羽林 魏羽林左右監與漢同
夏侯玄爲右桓範爲左 晉罷羽林中

郎將又省一監置一監而已哀帝省宋武帝永初初復

置江右領營兵江左無復營兵羽林監及虎賁中郎將

並銅印墨綬武冠絳朝服其在陛列則鷩尾冠

鷩鳥每闕死不

止絳紗縠單衣江左不復著鷩冠齊因之後魏有羽林

監北齊置監十五人後周有左右羽林率屬大司馬隋

煬帝改左右領軍爲左右屯衛所領兵爲羽林大唐貞

觀十二年於玄武門置左右屯營以諸衛將軍領之其

兵名曰飛騎又於飛騎中簡才力驍捷善射者號爲百

騎扈從遊幸則衣五色袍乘六閑馬賜猛獸衣韉龍朔

二年改左右屯營爲左右羽林軍武太后臨朝永昌元

年改百騎為千騎天授中改軍為衛中宗景龍元年改

千騎為萬騎大將軍一人

大足元年左右羽林衛各增置將軍一人

所掌與

左右衛同將軍各三人以副之

領官屬並大唐置

左右龍武軍

左右神武等軍附

大唐之初有禁兵號為百騎屬羽林永昌元年改羽林

百騎為千騎景龍元年改千騎為萬騎仍分為左右營

開元二十六年析羽林軍置左右龍武軍以左右萬騎

營隸焉

官屬並大唐置至德中分置左右神武軍各置官屬如羽林之制

通典卷二十八

欽定四庫全書

通典卷二十九

唐 京兆杜佑君卿纂

職官十一

武官下

大將軍 并官屬

大將軍戰國時官也楚懷王與秦戰秦敗楚虜其大將

軍屈平是矣漢高帝以韓信爲大將軍

初拜信蕭何曰王素慢無禮今

拜大將如兒戲耳乃擇良日齋戒設壇以禮拜
之又竇嬰爲大將軍每朝大議列侯莫敢抗禮武帝又

置初武帝以衛青數征伐有功以爲大將軍欲尊寵之

故置大司馬官號以冠之

衛青字仲卿爲車騎擊匈奴大立功引兵至塞天子使使

者持大將軍印因軍中拜青爲大將軍位在公上卿以下皆拜惟汲黯獨揖後又加青大司馬位冠於大將軍

上共爲後霍光王鳳等皆然成帝綏和二年賜大司馬
一官

印綬罷將軍官後漢光武時吳漢以大將軍爲大司馬

後漢大將軍自爲一官其大司馬不加於其上和帝時以竇憲爲之舊大將軍

位在三公下置官屬依太尉憲威權振朝廷公卿希旨

奏憲位次太傅下三公上長史司馬秩中二千石從事

中郎二人六百石自下各有增

憲初爲此官威振天下尚書以下欲拜之伏稱

萬歲尚書令韓稜曰禮無人臣稱萬歲之制乃止後梁冀爲之官屬倍於三公府

自安帝政理

衰缺始以嫡舅耿寶爲大將軍常在京都順帝即位又

以皇后父兄弟相繼爲大將軍如三公

梁冀列傳云元嘉二年又加冀

禮儀大將軍朝到端門謁者將引增掾屬舍人令史官騎鼓吹各十人風俗通曰桓帝初京師誣曰游平賣印

自有評不避豪強及大姓按竇武字游平爲大將軍印綬所加咸得其人漢末猶在三公上

魏武爲大將軍袁紹爲太尉紹恥班在下魏武乃固以大將軍讓紹魏黃初中又有上大

將軍以曹真爲之

吳亦以陸遜爲上大將軍諸葛恪爲大將軍

明帝青龍三

年晉宣帝自大將軍爲太尉然則大將軍在三司下矣其後又在三司上自漢東京大將軍不常置爲之者皆擅朝權至晉景帝爲大將軍亦受非常之任後以叔父孚爲太尉奏改大將軍在太尉後位次三司下後復舊在三司上太康元年瑯琊王伷遷大將軍復制在三司下伷薨復如舊冠綬佩服與大司馬同宋唯彭城王義康爲之章綬冠佩亦與晉同齊以爲贈梁有之陳以爲

贈後魏北齊爲二大與大司馬同後周建德四年增置
上大將軍隋並以爲武散官不理事上大將軍從二品
大將軍正三品大唐貞觀二年九月勅六軍先已各置
統軍一人今十六衛宜各置上將軍一人秩從二品其
左右衛及左金吾衛上將軍俸料隨軍人馬等並同六
軍統軍其諸衛上將軍次於統軍支給自今已後內外
文武闕官於文武班中材望相當者參叙仍符以後各
依故事於本衛量置衛兵仍舉故事置武班朝參其廊

下食亦宜加給稍令優重漢不見官屬後漢大將軍驃

騎將軍車騎將軍衛將軍有長史一人司馬一人

竇憲爲大

將軍置長史司馬員吏官屬位次太傅屬官

從事中郎二人掾屬二十九人

令史及御屬三十一人又賜官騎四十人及鼓吹

應劭曰鼓

吹二十人非常員

其領軍皆有部曲大將軍營五部部校尉一

人軍司馬一人部下有曲曲有軍候一人曲下有佗佗

長一人其不置校尉部但有軍司馬一人其別營領屬

爲別部司馬其兵多少各隨時宜門有門候魏以司馬

景王爲大將軍置掾十人別無屬官其驃騎車騎府有
長史司馬晉驃騎衛將軍伏波撫軍都護鎮軍中領四
征四鎮龍驤典軍上軍輔國等大將軍開府者皆爲位
從公品秩俸賜亦與諸公同加兵者增置司馬一人從
事中郎二人主簿記室督各一人官屬並與公同宋大
將軍驃騎車騎衛將軍諸府皆有長史一人又各置司
馬一人齊有大將軍爲贈官無僚屬諸驃騎車騎衛鎮
軍中軍撫軍四征四鎮等將軍凡加大字位從公長史

司馬諸官屬亦同公梁因之諸將軍優者亦然陳爲贈
官無僚屬後魏大將軍僚屬如三公北齊亦然後周大
將軍有長史司馬中郎掾屬諸曹參軍典籤等員隋以
後無

車騎將軍

漢文帝元年始用薄昭爲車騎將軍

灌嬰周亞夫金
日碑並爲之

後

漢章帝即位西羌反以舅馬防行車騎將軍征之銀印
青綬在卿上絕席還復罷和帝即位以舅竇憲爲車騎

將軍征匈奴始賜金紫次司空

竇憲爲車騎將軍辟崔駰爲掾憲府貴重掾屬

三十人皆故刺史二千石惟駰以處士年少擢在其間其僚佐故事如太尉後梁冀爲之官屬倍於餘府安

帝即位西羌寇亂以舅鄧騭爲車騎將軍征之數年復

罷

又皇甫嵩等並爲之其官屬附見大將軍後

靈帝數以車騎拜嬖臣及贈

亡人

應劭曰美號加於頑克印綬汙於腐屍虧國家之舊傷號武之重昔年有覩被髮之祥知其爲戎今

假號雲集不亦宜乎

魏車騎爲都督儀與四征同若不爲都督雖

持節屬四征者與前後左右雜號將軍同其或散還從

文官之例則位次三司晉宋車騎衛不復爲四征所督

晉羊祜爲車騎將軍
開府如三司之儀

後魏制與驃騎同

位次升降並同

隋車騎

屬驃騎府大唐省之

說在前篇

衛將軍

漢文帝始用宋昌爲衛將軍位亞三司其官屬附見大將軍後凡驃騎車騎衛三將軍皆金印紫綬武冠絳朝服佩水蒼玉晉以陸暕爲衛將軍兼儀同三司加千兵百騎東晉以後尤爲要重後魏初加大則次儀同三司孝文太和中制加大則位在太子太師上歷代多有太

唐無之

前後左右將軍

前後左右將軍皆周末官秦因之位上卿金印紫綬漢

不常置或有前後或有左右皆掌兵及四夷

李廣爲前將軍趙充

國爲後將軍辛慶忌王商爲左將軍馮奉世爲右將軍

光武建武七年省魏以來

復置晉武初又置前軍左軍右軍太始八年又置後軍是爲四軍齊亦號左右前後四軍陳並有之北齊左右將軍領千牛備身大唐無

四征將軍

四征將軍皆漢魏以來置加大者始曰方面征東將軍

漢獻帝初平三年以馬騰為之或云以張遼為之

征西將軍

漢光武建武中以馮異為大將軍

征

南將軍

漢光武建武二年置以馮異為之亦以岑彭為大將軍

征北將軍

魏明帝太和

置劉靖為之許允亦為之

各一人魏黃初中位次三公後魏加大則

次衛將軍大唐無

四鎮將軍

鎮東將軍

後漢末魏武帝為之

鎮南將軍

後漢末劉表為之魏張魯晉當陽侯杜元凱並

爲鎮西將軍

後漢劉表爲之魏鍾會鄧艾並爲之

鎮北將軍

魏明帝太和中置劉靖許

允並爲之

各一人宋時四鎮與中軍爲雜號後魏加大次尚

書令大唐無

四安將軍

安東將軍

後漢陶謙曹休並爲之

安南將軍

光武元年以岑彭爲之晉范陽王虓亦爲

之

安西將軍

後漢末段熲魏鍾會晉郝鑒亦爲之

安北將軍

晉以郝鑒爲之各一

人後魏亦有大唐無

四平將軍

平東將軍

晉當陽侯杜元凱王濬等為之

平南將軍

晉盧欽羊祜胡奮等為之

平西

將軍

晉以嵇紹為之

平北將軍

漢獻以張燕晉阮坦亦為之

各一人並漢魏間

置後魏亦有大唐無

雜號將軍

歷代雜號將軍凡有數百不可具載今錄其著者

上

漢以呂祿為上將軍

騎

漢武帝以公孫敖及公孫賀並為騎將軍

樓船

漢元封三年以荀彘為之

橫海

漢元鼎六年以韓說為之擊東越有功

材官

漢李息為之掌理宮室

貳師

漢李廣利

為之征貳師城取善馬故以為號

輕車

漢武帝以公孫賀為之

伏波

漢武帝征南越始置此號

以路博德為之後漢馬援亦為之伏波者船涉江海欲使波浪之伏息

中軍

漢武帝以公孫敖為之

强弩

漢武帝以

戈船

環氏要畧云建戈於船上浮渡沮水以討北狄

奮威

漢武帝以

田千秋

度遼

漢武帝初以范明友為度遼將軍後漢明帝永平八年又置屯五原銀印青綬种嵩

字伯景為度遼將軍誠心懷撫信賞分明乃去烽燧斥堠邊方晏然及卒匈奴舉國傷惜單于每入朝賀每見

墳輒哭泣祭祀又李膺積射

漢有之晉武帝太始四年省太康十五年立射營弩

營置積射强弩將軍主之

建威

漢元帝以韓安國王晏並為之光武以耿弇為之

九武

王莽拜將

軍九人皆以武為號號曰九武將軍

征虜

後漢建武中始以祭遵為之後張飛亦為之

武牙

後漢光武

以蓋延

橫野

後漢光武以王常為橫野大將軍位與諸將絕席

捕虜

後漢永平中馬武為

之鷹揚

後漢建安中魏武以曹洪為之

討逆

後漢末以孫策為之

破虜

後漢末以孫堅為之

討虜

後漢末以孫權爲之

安漢

蜀糜竺爲之班在軍師將軍之右

武威

魏武帝以于禁爲之

撫軍

魏武帝置以司馬宣王爲之

凌江

後漢置以羅獻爲之

寧朔

魏以王橫江

吳魯肅爲之又曰魯橫江昔仗萬人屯據陸口界

龍驤

晉武帝始以王濬爲之

殿中

宋初置之

黑稍

後魏于栗磾好持黑稍以自衛劉裕遙見題書與之曰黑稍公麾下明帝因授黑稍將軍

牙門

將

冠服與將軍同魏文帝黃初中置明帝以胡烈爲之又王隱晉書云陸機少襲父爲牙門將吳人重武官

故也晉惠帝特置四部牙門以汝南王祐爲之蜀以趙雲爲之

監軍

軍師祭酒理曹掾屬附

周代齊景公使穰苴將兵捍燕晉之師穰苴願得君之

寵臣以監軍公使莊賈往賈不時至苴斬之是其始也

漢武帝置監軍使者光武以來歛監諸將後漢末劉焉

以監軍使者領益州牧

劉璋亦爲監軍使者

魏晉皆有之

魏時司馬丈王

征壽春石苞爲監軍鍾會伐蜀衛瑾爲監軍晉孟康持節監石苞諸軍事

初隗囂軍中嘗置

軍師

隗囂聘平陵人方望以爲軍師又袁紹請盧損爲軍師

至魏武帝又置師官

四人

魏荀攸爲軍師軍國選舉及刑獄法制皆使決焉又梁義爲左軍師吳朱然爲右軍師蜀以諸葛亮

爲軍師將軍

晉避景帝諱改爲軍司凡諸軍皆置之以爲常

員所以節量諸宜亦監軍之職也而太尉軍司尤重故

山公啟事曰太尉軍司缺當選上宰監宜得宿有資重者也宋齊以來此官頗廢至梁大通四年元法僧北討復以羊侃爲大軍司後代多不置至隋末或以御史監

軍事大唐亦然時有其職非常官也開元二十年後並

以中官爲之謂之監軍使○軍師祭酒

後漢建安三年曹公還許初置

此官理曹掾屬

後漢建安十九年魏武令曰軍中典獄者或非其人而任以三軍死生吾甚懼之遂

置此選明達法理者爲之

三署郎官叙

漢中郎將分掌三署郎有議郎中郎

皆比六百石

侍郎

比四百石

郎中

比三百石

凡四等皆秦官無員多至千人

靈帝時三署郎吏二千餘

人

皆掌門戶出充車騎

其散郎謂之外郎

故卿校尉牧守待價

於此公車特徵賢良方正敦樸有道高節公府掾曹試

博士者亦充茲位其下第白衣試博士者皆拜郎中中

郎有五官左右三將

謂五官中郎將左右郎將

郎中有車戶騎三將

如淳曰主車曰車郎主戶衛曰戶郎漢舊儀曰郎中令主郎中左右車將主左右車郎左右戶將主左右戶郎

凡郎官皆主更直執戟宿衛諸殿門唯議郎不在直中

漢儀曰三署郎見光祿勳執板拜若見五官左右將執板不拜於三公諸卿無敬

郎官故事令

出錢市財用給文書乃得出時號曰山郎

謂以貲財爲郎也山者財

用之所出故取名

或至歲不得休沐其豪富郎日出遊戲或行

錢得善部貨賂流行轉相放傲楊惲

字子幼

爲中郎將罷

山郎其疾病休沐皆以法令有過奏免薦舉其高第有

行能者多至郡守九卿三署化之莫不自勵宮殿之內

翕然同聲其後遂以爲常

後漢和帝永元元年初令郎官詔除者得占丞尉以比秩

爲真凡三署郎官二漢並屬光祿勳光祿選三署郎有行

應四科者歲舉茂才二人四行二人

後漢范滂字孟博舉孝廉光祿四行

時冀州饑荒盜賊羣起乃以滂爲清詔使以按察之滂登車攬轡慨然有澄清天下之志及到州境守令有贓汚者望風解印綬而去其所舉奏莫不厭塞衆議又上廉吏六人爲長理劇隨

缺多少萬戶以上爲劇縣其缺少者不選公府亦然故

明帝時館陶公主爲子求郎帝不許賜錢十萬曰夫郎

官上應列宿出宰百里苟非其人人受其殃

後漢桓靈間三署見

郎七百餘人而郡國計吏多留拜爲郎太尉楊秉上疏諫曰先王建國順天制官太微積星名爲郎位入奉宿衛出牧百姓云云按自近代皆謂郎官上應列宿出宰百里爲尚書郎故事且夫天文有武賁郎位等星皆在

太微帝座之後爲翊衛之象則應劭楊秉所言三署郎是也而世人謂之尚書郎則誤矣徵其失也蓋自梁陶藻職官要錄以漢三署郎故事通爲尚書郎循名失實疑誤後代

舊有郎中將右騎光

武中興悉省

並爲郎中後漢明帝性褊察嘗以事怒郎

藥崧崧走入床下上將杖撞崧崧曰天子穆穆諸侯皇皇未聞人君自起撞郎上乃捨之又班固二代位不過郎又陳蕃諫靈帝曰昔明帝公主爲子求郎賜錢十萬今陛下除拜郎吏無有休已以一郎比一把菜耳

議郎遷爲太守

山公啟事曰議郎許允宜叅廣漢太守選

亦有郎中等官其

後雖有中郎將等官而無三署郎矣

中郎將

五官中郎將

左右中郎將

五官左右中郎將皆秦官漢因之並領三署郎從後漢之制郡國舉孝廉以補之三署郎年五十以上屬五官

後漢黃琬字子琰爲五官中郎將時陳蕃爲光祿勳深相敬待每與議事舊制光祿舉三署郎以功高久次才德尤異者爲茂才四行時權富子弟多以人事得舉而貧約守志者見遺京師諺曰欲得不能光祿茂才於是蕃琬同心顯用志士故蕃琬皆爲權富郎所中傷也其次分屬左右署左右郎將

各領左右署郎二署皆有中郎侍郎郎中三郎並屬光

祿勳

漢衛綰文帝時以戲車爲中郎將戲車謂能左右起乘也景帝幸上林詔綰參乘重其淳謹又蘇武

以中郎將持節使匈奴又司馬相如拜中郎將建節往使邛笮縣令負弩矢前驅蜀人以爲寵又後漢左中郎

將皇甫嵩右中郎將朱儁並討黃巾有大功又建安十六年魏公子丕爲五官中郎將置官屬以副丞相位在魏國諸侯王上魏無三署郎猶置左右中郎將晉武帝省左右

中郎將官宋孝武大明中復置銀章青綬武冠絳朝服佩水蒼玉齊左右中郎將屬西省梁代並分司丹禁今中郎將四十四員郎將六十四員各附諸軍諸衛篇大唐亦置諸衛中郎將永徽三年八月避太子名改中郎將爲旅賁郎將又改爲翊軍郎將尋復舊

虎賁中郎將

周官有虎賁氏掌領虎士八百人軍旅會同君宿於外

則守王闕

闕 檻 檻行馬也
檻音陞 檻音護

漢武帝建元三年初置期門

比郎中蓋以微行出遊選材力之士執兵從送期之諸

門故名期門無員多至千人平帝元始元年更名虎賁

郎

舊曰虎奔言
如虎之奔

置中郎將領之故有虎賁中郎將主虎

賁宿衛冠插兩鷩尾

鷩鷩鳥之中果勁者每有攫撮應
爪摧碎尾上黨所貢也後漢崔鈞

爲武賁中郎將服武
弁戴鷩尾攫音攫

紗縠單衣虎文錦袴餘郎亦然凡

有虎賁中郎虎賁侍郎虎賁郎中節從虎賁皆父死子

繼若死王事亦如之前賢亦多爲者

後漢馬援孔融並爲虎賁中郎將遷

尚書魏桓階字伯緒爲虎賁中郎將遷尚書典選

大唐無

四中郎將

東西南北

東中郎將

後漢靈帝以董卓爲之

南中郎將

後漢獻帝以臨淄侯曹植爲之

西中

郎將

晉以謝曼桓冲爲之

北中郎將

後漢以盧植爲之建安中以鄢陵侯曹彰爲之

並後

漢置江左彌重或領刺史或持節爲之銀印青綬服同

將軍後魏靈太后時四中郎將兵數寡弱不足以襟帶

京師任城王澄奏宜以東中帶滎陽郡南中帶魯陽郡

西中帶恒農郡北中帶河南郡選二品三品親賢兼稱

者居之配以強兵則深根固本之計也

靈太后初從之後復止大唐至

德後節度都團練使殆其遺職

雜中郎將

使匈奴中郎將

後漢主護南單于以張奐爲之後魏天興四年罷

平越中郎將

晉武帝置理廣州主護南越

司金中郎將

趙王循爲之

武衛中郎將

魏始以許

褚爲大唐無

折衝府

果毅別將等附

隋初左右衛左右武衛左右武侯各領軍坊鄉團以統戎卒開皇中置驃騎將軍府每府置驃騎車騎二將軍大業三年改驃騎府爲鷹揚府改驃騎將軍爲鷹揚郎

將改車騎將軍爲鷹揚副郎將

五年又以鷹揚副郎將爲鷹擊郎將

九年

別置折衝果毅及武勇雄武等郎將官以統領驍果大唐武德初猶有驃騎府及驃騎車騎將軍之制武德七年乃改驃騎爲統軍車騎爲別將貞觀十年復採隋折衝果毅郎將之名改統軍爲折衝都尉別將爲果毅都

尉

魏有折衝將軍後周有成議別將官其名因此也

其府多因其地各自爲名

無鷹揚之號凡五百七十四府分置於諸州而名隸諸

衛及東宮率府各領兵滿一千二百人爲上府

兩京城內雖不

滿此數亦同上府

千人爲中府

兩畿及岐同華懷陝等五州所管府雖不滿此數亦同中府

八百人爲下府每府置折衝都尉一人

掌領校尉以下宿衛及衛士以

上總判府事

左右果毅都尉各一人

掌通判春秋傳曰戎昭果毅又曰殺敵爲果致

果爲毅煬帝始置後改將爲之

別將一人

不判府事若無兵曹以上即知府事初別將既改爲果毅

而府中有長史員聖歷三年廢長史置別將一員後又兼置長史

長史一人

通判載初元年置

兵曹一人

判府事付事勾稽監印給紙筆

校尉六人

以下小吏各有差若校尉以下唯人

數置之

凡府在赤縣爲赤府在畿縣爲畿府衛士以三百

人爲團團有校尉五十人爲隊隊有正十人爲火火有

備六馱馬驢

初置八馱後改爲六

米糧介冑戎器鍋幕貯之府庫

以備武事每歲十一月以衛士帳上於兵部以候徵發

天下衛士向六十萬人

初置以成丁而入六十出役其家不免征徭遂漸逃散年月漸

久逃死者不補

天寶八年五月停折衝府

以無兵可校之

十一年八月

改諸衛士爲武士

三都尉

奉車

駙馬

騎

奉朝請附

奉車駙馬騎三都尉並漢武帝元鼎二年初置

李陵爲騎都尉

至更始時官亂謠曰爛羊胃騎都尉

舊無員或以冠常侍或卿尹校尉左

遷爲之奉車掌御乘輿車

漢官曰三人

駙馬掌駙馬

駙馬非正駕車

皆爲副馬一曰駙近也疾也

騎都尉本監羽林騎

漢官十人

又竇嬰爲朝

請

竇太后除嬰門籍不得入朝請漢律諸侯奉朝天子曰朝秋曰請

後漢並屬光祿勳

奉朝請無員本不爲官漢東京罷省三公外戚皇室諸

侯多奉朝請奉朝請者奉朝會請召而已晉武帝亦以

皇室外戚爲三都尉而奉朝請焉元帝爲晉王以參軍爲奉車都尉掾屬爲駙馬都尉行參軍舍人爲騎都尉皆奉朝請後罷奉車騎二都尉唯留駙馬都尉奉朝請而已諸尚公主者若劉惔桓溫等皆爲之宋武帝永初以來以朝請選雜其尚主者唯拜駙馬都尉齊奉朝請駙馬都尉及散騎給事中等官並集書省職朝散用衣冠之餘人數猥積武帝永明中奉朝請至六百餘人

齊職

儀曰凡尚公主拜駙馬都尉

梁三都尉並無員秩其奉車駙馬皆武

冠絳朝服銀章青綬梁陳駙馬皆尚公主者爲之

陳武帝長

女永世公主先適陳留太守錢歲生子岳及岳並卒武帝受禪唯公主追封將葬尚書主客牒詳議欲加歲駙馬都尉并贈岳官袁樞議曰昔王姬下降必適諸侯同姓爲主間於公羊之說車服不繫著於詩人之篇漢氏之初列侯尚主自斯以後降嬪素族駙馬都尉置由漢武或以假諸功臣或以加於戚屬是以魏表駙馬爲一號魏晉以來因爲常准蓋明王姬之重庶姓之輕若不加其等級莫可合卺而醕所以假駙馬之位乃崇於皇女今公主早薨伉儷已絕既無禮數致疑何須駙馬之授按當陽侯杜元凱尚晉宣帝第二女高陸宣公主晉武踐祚而主已亡泰始中追贈公主杜君無復駙馬之號梁元帝女新安穆公主早薨天監初王氏無追拜之事遠近二例足以據明公主所生既未及成人之禮無勞此授今宜追贈亭侯時以樞議爲衷歲且善反岳音

節

後魏駙馬都尉亦爲尚公主官雖位高卿尹而此職
不去奉車二十人騎都尉六十人北齊駙馬與後魏同
隋開皇三年罷奉朝請煬帝時奉車駙馬並廢大唐駙
馬都尉從五品皆尚主者爲之開元三年八月勅駙馬
都尉從五品階宜依令式仍借紫金魚袋天寶以前悉
以儀容美麗者充選奉車都尉五員掌馭副車不常置
若大備陳設則以餘官攝行屬左右衛也

通典卷二十九

欽定四庫全書

通典卷三十

唐 京 兆 杜 佑 君 卿 纂

職官十二

東宮官

凡三王教世子必以禮樂樂所以修內禮所以修外禮

樂交錯於中發形於外是故其成也懌恭敬而溫文

心中

也懌
悅也

立太傅少傅以養之欲其知父子君臣之道也

言
養

者積浸成長也

太傅審父子君臣之道以示之少傅奉世子以

觀太傅之德行而審諭之太傅在前少傅在後

謂其在學時也

入則有保出則有師

謂燕居出入時也漢班彪上書曰昔成王爲孺子出則周公召公史

佚入則太顛閔天南宮适散宜生左右前後皆正禮

是以教諭而德成也師也者

教之以事而諭諸德者也保也者慎其身以輔翼之而

歸諸道者也

慎其身者謹安護之

秦漢以下始加置詹事中庶子

及諸府寺等官亦有以他官而監護者

漢孝宣帝欲令中郎將許舜監

護太子家疏廣以爲示狹非所以廣太子也後漢順帝立太子居承光宮以侍御史种暭監護有中常侍卒乘

衣車來載太子太子太傅杜喬憂懼不能止開門將出而馮至手劍當車曰太子國之儲副人命所繫常侍來無尺一何以得將太子去何知不與內寵姦臣共挾邪謀今日之事有死而已乃遣喬詣臺啟白得中奉敕乃聽之自魏明帝以後久曠東宮制度闕廢官司不具

吳孫權即

位孫登爲太子兼置四友等官以諸葛恪爲左輔張休爲右弼顧譚爲輔正都尉陳表爲翼正都尉是爲四友於是東宮

疏爲多士

晉初詹事左右率庶子中舍人諸官並未置

唯置衛率令典兵二傳并攝衆事至咸寧元年始置詹事以領宮事宋孝武置東宮率更令等官其中庶子庶子中舍人舍人洗馬各減舊員之半後周加置太子諫

議員四人至隋罷詹事分東宮置門下坊典書坊

北齊已有

典書坊

以分統諸局

比門下內史二省

門下坊有左庶子二人內

舍人四人錄事二人統司經宮門內直典膳藥藏齋師

等六局典書坊有右庶子二人舍人通事舍人各八人

領內坊大唐置詹事府以統衆務置左右二春坊以領

諸局

龍朔二年改門下坊爲左春坊典書坊爲右春坊咸亨初復舊景雲元年又改爲之

左春坊

置左庶子二人中允二人司議郎四人錄事二人左諭

德一人左贊善大夫五人崇文館校書郎八人亦統六

局

六局之中唯改齋師爲典設餘局名與隋同其六局長官唯司經置洗馬宮門置大夫餘各置監以局名

冠之所職如其名龍朔中改宮門大夫及諸監並爲郎遂爲永制也右春坊置右庶子二

人中舍人二人舍人四人錄事二人右諭德一人右贊

善大夫五人通事舍人八人兼領內坊

內坊置典內二人掌閣內諸事

諸坊局小吏各有差因隋制也

太子六傅 三太 三少

太子師保二傅殷周已有

二傅爲太傅少傅詩小弁篇太子之傅作焉以刺幽王弁

音步逮乎列國秦亦有之

孝公時商鞅設法漢高帝以

叔孫通爲太子太傅位次太常後亦有少傅

初叔孫通爲太子太

傅高帝欲立趙王廢太子通諫曰昔晉獻公以驪姬故廢太子晉國亂者數十年秦不早定扶蘇終使滅祀今太子仁孝陛下必廢嫡立庶臣願先伏誅以頸血汙地上曰公罷吾戲耳通曰太子天下本本一搖天下振動奈何以天下戲乎又高帝東征留太子監關中兵謂張良曰子房雖病強卧而傅太子時叔孫通爲太傅留侯行少傅事後太子幾廢良立策召四皓以免又竇嬰爲太傅景帝欲廢太子嬰數爭不得因謝病屏居田南山下又疏廣字仲翁爲太傅兄子受爲少傅父子並爲師傅朝廷以爲榮後皆請免歸鄉里公卿祖餞東都門外百姓觀者數曰賢哉二大夫初太子外祖許伯以太子少請使其弟舜監護太子家廣曰太子國儲副君師友必天下英俊不宜獨親外家今官屬已備若親暱外家非所以廣太子德於天下也上善之又夏侯勝字長公

爲太傅卒官太后以嘗受尚書於勝素服五日以報師傳之恩儒者以爲榮又萬石君石奮韋玄成丙吉並爲太傅又匡衡王丹並爲少傅後漢太傅禮如師不領官屬而少傅主

太子官屬

光武大會百官曰誰可傳太子者羣臣承意皆言太子舅執金吾陰識可博士張佚曰今

陛下立太子爲陰氏乎爲天下乎即爲陰氏則陰侯可爲天下則宜用天下賢才上曰欲署者以輔太子也今博士不難正朕況太子乎即拜佚爲太傅桓榮爲少傅又明帝以鄧禹先帝名臣拜太子太傅漢魏故

事太子於二傅執弟子禮皆爲書不曰令少傅稱臣而

太傅不臣

吳薛綜綜子瑩瑩子兼三代並爲太子少傅

晉太始三年武帝始

建置東宮各置一人尚未置詹事官事無大小皆由二

傳少傳立草太傅書真以爲儲訓並有功曹主簿五官
秩與後漢同皇太子先拜諸傅然後答之如弟子事師
之禮二傳不得上疏曲敬武帝後以儲副體尊遂命諸
公居之以本位重故或行或領時侍中任愷武帝所親
敬復使領之蓋一時之制也咸康元年以給事黃門侍
郎楊珧爲詹事掌宮事二傳不復領官屬及楊珧爲衛
將軍領少傳復省詹事遂崇廣傳訓命太尉賈充領太
保司空齊王攸領太傅所置吏屬復如舊二傳皆進賢

兩梁冠黑介幘五時朝服佩水蒼玉

晉令曰太子太保銀印青綬

其

後太尉汝南王亮車騎將軍楊駿司空衛瓘石鑒皆領

傳保猶不置詹事以終武帝之代惠帝元康元年復置

詹事

二傳給菜田六頃田騶五十人夏後不及田者食俸一年給赤耳安車一乘

及愍懷建

宮乃置六傳三太三少

晉書曰東宮舊制月請錢三十萬以脩衆用愍懷太子恒採取

三月以供嬖寵

以景帝諱師故改太師爲太帥通省尚書事詹

事文書關由六傳

職官要錄曰晉太子六傳各有丞一人

自元康之後諸

傳或三或四或六渡江之後有太傳少傳不立師保

晉王

導爲太傅時孝懷太子爲胡所害始奉諱有司奏天子
三朝舉哀羣臣一哭而已導以皇太子普天之痛羣下
宜同三朝之制元帝從之又齊王攸領太傅作太傅箴
獻於太子傳玄亦有少傅箴又任愷山濤張華並爲少
傅又云衛瓘領少傅加千兵百騎鼓吹之府山公啟事
曰太子保傅不可不高盡天下之選羊祜秉德尚義可
出入周旋令太子每覩儀刑方任雖

宋有太傅少傅各

重比此爲輕又可朝會與聞國議

兼丞一人其保傅並銀章青綬齊與宋同武帝時以王

儉爲少傅舊太子敬二傅同至是朝議接少傅以賓友

之禮梁太傅位視尚書令少傅視左僕射

職官要錄曰
三少舊視左

僕射冠服
同三太也

陳因之自宋以下唯有傅而無師保後魏有

太師太傅太保謂之東宮三師少師少傅少保謂之東

宮三少

孝明在東宮宣武皇帝欲以崔光爲太子師傅光固辭帝令太子南面再拜宮臣皆從太子拜

光北面立不敢答拜唯西面拜謝而出乃授光太子少傅

北齊皆有之出則三師在

前三少在後後周不置隋與北齊同大唐六傅不必脩

唯其人太子出則乘輅脩儀以爲後從貞觀中太宗撰

太子接三師之儀出殿門迎太子先拜三師答拜每門

讓三師坐與三師書前名惶恐後名惶恐再拜

先天元年十二月

詔東宮三師三少宜開府置令丞各一人隸詹事府尋罷

太子賓客

漢高帝時有四人年老以上慢侮逃匿山中義不爲漢

臣謂之四皓

東園公綺里季夏黃公角里先生

高帝不能致及將廢太

子太子迎四人至侍從太子鬚眉皓白衣冠甚偉高帝

既見曰煩公幸卒護太子太子由是不廢至武帝又爲

太子立博望苑使通賓客晉元康元年愍懷太子始之

東宮惠帝詔曰通幼蒙今出止東宮雖賴師傅羣賢之

訓其遊處左右宜得正人能相長益者太保衛瓘息庭

司空隴西王泰息畧太子太傅楊濟息毖太子少師裴楷息憲太子少傅華廙息恒各道義之門有不肅之訓其令五人更往來與太子習數脩賓友也其時雖非官而謂之東宮賓客皆選文義之士以侍儲皇其後無聞大唐顯慶元年正月以太子太傅兼侍中韓瑗中書令來濟禮部尚書許敬宗左僕射兼太子少師于志寧並爲皇太子賓客遂爲官員定置四人掌調護侍從規諫凡太子有賓客之事則爲上齒蓋取象於四皓焉資位

閑重其流不雜

天寶中賀知章自太子賓客度爲道士還鄉捨宅爲觀玄宗賦詩贈別時議榮

之

太子詹事

丞

主簿

司直

詹事秦官

應劭曰詹省也給也

漢因之掌皇后太子家

皇后太子各置詹事

隨其所在以名官漢官曰詹事位在長秋上亦宦者主中諸官後漢志曰初成帝鴻嘉三年省詹事職并大長秋是後皇后當法駕出則中謁中宦者職吏權兼詹事奉引訖罷宦者誅後尚書選兼職吏一人奉引此皆皇

后詹事也

漢時太子門大夫庶子洗馬舍人皆屬二傳其太

子家令丞率更令丞僕中盾衛率等官並屬詹事

寶嬰字王

孫景帝時為詹事帝弟梁孝王母竇太后愛之酒酣上曰千秋萬歲後傳梁王太后歡嬰引酒卮進上曰天下者高帝天下父子相傳漢之約也後漢省詹事而太子

上何以得傳梁王太后由是憎嬰官悉屬少傅魏復置詹事領東宮衆務晉不置至咸寧

元年復置以掌宮事

事具六傳篇

及永康中復不置自太安

以來又置終孝懷之代其職擬尚書令掌三令四率中

庶子庶子洗馬舍人等官銀印青綬介幘進賢兩梁冠

絳朝服佩水蒼玉

晉卞壺為詹事時稱卞壺裁斷切直忠於事上

宋與晉同齊

置府領官屬

齊沈文季為太子詹事

梁陳任總宮朝後魏有太子

左右詹事北齊東宮衆事無大小皆統之領三寺二坊及左右衛後周置太子宫正宮尹隋開皇初置詹事二年罷之大唐復置詹事府詹事一人掌內外衆務糾彈非違總判府事置少詹事一人以貳之龍朔二年改詹

事為端尹

詹事府為端尹府

少詹事為少尹咸亨初復舊垂拱

元年又改詹事為宮尹少詹事為少尹神龍初復舊○

丞秦官漢因之後漢省魏晉隋詹事省置至晉永康中詹事特置丞一人掌文書關通六傳過江多用員外郎

遷尚書郎宋齊因之梁陳制一梁冠皂朝服銅印墨綬

後魏北齊並有之

後魏楊昱字元畧爲詹事承孝明爲太子尚在懷抱其所出入唯乳母而

已不令官僚聞知昱諫曰太子動止宜令翼從陛下若召太子必降手勅令臣下咸知乃詔曰自此以後非朕

手勅勿令兒出宮宮臣在直從至萬歲門隋初置一人大唐置二人掌文武

官簿帳朝集假使

分判府事

○主簿一人晉始置自後歷代

皆有大唐因之掌府事勾稽監印紙筆○司直二人大

唐龍朔三年置桂坊比御史臺置令一人比大夫司直

二人比侍御史掌彈劾官府察其後廢桂坊以司直隸

詹事府

太子庶子

中允 司議郎 中舍人 舍人 通事舍人 諭德 贊善 崇文館學士

洗馬

文學

校書

正字

典膳

藥藏

內直

典設

宮門等郎

古者天子有庶子之官

周官謂之諸子

職諸侯卿大夫之庶子

掌其戒令與其教治有大事則帥國子而致於太子唯

所用之秦因之置中庶子庶子員

宋志云後漢置中庶子按齊人鄒陽上疏

云秦皇帝任中庶子蒙嘉言而荆軻入關則秦官明矣

漢因之有庶子員五人史

丹王商歐陽地餘並爲中庶子

王莽改曰中尚翼子

後漢員五人

職如侍中而庶子無員職如三署中郎凡庶子主宮中

并諸吏之適子及支庶版籍魏因之在吳爲親近之官

吳張溫言於孫權曰中庶子官最親密切問近對宜用雋選由是以顧譚爲之晉中庶子庶子

各四員職比散騎常侍及中書監令皆以俊茂者爲之

或以郡守叅選

山公啟事曰中庶子缺宜得俊茂者以濟陰太守劉儼城陽太守石崇叅選晉

書曰鄭默爲中庶子朝廷以爲太子官屬宜稱陪臣默上言皇太子體皇極之尊無私於天下宮臣皆受命天朝不得同之藩國事遂施行又溫嶠爲中庶子獻侍臣箴甚見補益又王珣啟以桓謙爲中庶子曰東宮之選中庶子總管門下尤不可不得其才若釋奠中庶子扶左庶子扶右宋與

晉同武冠平巾幘絳朝服元嘉初詔二率中庶子隨太子入直上宮十四年又詔還直東宮至齊其庶子用人卑雜梁天監七年詔革選其年以太子中舍人司徒從事中郎為之凡中庶子四人以功高者一人為祭酒行則負璽前後部護駕與功高中舍人一人共掌其坊之禁令庶子四人掌侍從左右獻納得失與功高通事舍人一人共掌其坊之禁令冠服並同前代陳因梁制後魏亦有中庶子庶子官北齊門下坊中庶子四人領之

典書坊庶子四人領之隋分爲左右庶子各二人分統

門下典書二坊事

劉行本爲左庶子卒後而太子勇廢文帝曰若使劉行本在勇當不及於

此

大唐亦各二人分掌左右春坊事龍朔二年改左右

庶子爲左右中護咸亨初復舊左擬侍中而右擬中書

令

貞觀中詔曰皇太子與百官書疏未有制式近代以來例皆名目無以別貴賤今凡處分論事之書皇太

子並宜稱令右庶子以下署名宣奉行書其餘與諸親及師傅等書不在此限于志寧爲太子右庶子撰諫苑

二十卷以進於太子太子名承乾

中允司議郎司經洗馬文學校書正

字典膳藥藏內直典設宮門等局郎丞崇文館並屬右

春坊中舍人舍人通事舍人並屬左春坊其諭德贊善亦左右分隸焉○中允後漢太子官屬有之職在中庶子下洗馬上漢制太子五日一朝其非朝日即使僕及中允朝朝請問起居其後無聞宋齊有中舍人是其職也大唐貞觀初改太子中舍人爲中允置二員其後復置中舍人龍朔二年又改中允爲左贊善大夫咸亨元年復爲中允而左贊善仍置焉中允掌侍從禮儀駁正啟奏并監藥及通判坊局事若庶子闕則監封題職擬

黃門侍郎永徽三年以皇太子諱忠改爲內允太子遜位而官復舊○司議郎大唐貞觀五年皇太子上表請置史職用司箴誡乃於門下坊置太子司議郎四人精選名士以居之龍朔中分爲左右以左司議郎替司議郎以右司議郎替舍人咸亨初復舊掌侍從規諫駁正啟奏并錄東宮記注分判坊事職擬給事中○中舍人晉咸寧初置中舍人四人以舍人才學之美者爲之與中庶子共掌文翰在中庶子下洗馬上

晉陸雲爲中舍人凡奏

事文書皆綜典之監和嘗藥月檢奏直臣名更直五日
典文疏如中書郎宋亦四人齊有一人梁時功高者一
人與中庶子祭酒共掌其坊之禁令陳因之後魏北齊
並有之隋曰內舍人四員屬門下坊煬帝減二人大唐
中舍人二員掌侍從令書奏疏通判坊事擬中書侍郎
永徽三年以皇太子諱忠改爲內舍人太子遜位而官
復舊或謂之太子中書舍人

孝和實錄曰王友
真太子中書舍人

○舍人

秦官也漢因之比郎中選良家子孫

晁錯鄭當時並
爲太子舍人後

漢無員更直宿衛如三署郎中凡帝初即位未有太子

太子官屬皆罷唯舍人不省屬少府魏因之晉有十六

人職比散騎中書侍郎從駕則正直從次直守妃出則

次直從

晉王衍以名門超為太子舍人又樂廣潘岳顧榮夏侯湛並為之元帝太興元年以太子舅虞

允為舍人太子奏曰舅甥當崇敬不設降舅氏之親為侍臣詔乃轉允為常侍山公啟事曰太子舍人夏侯湛

有盛才而不長

理人有益臺閣宋有四人齊有一人梁有十六人掌文

記

梁劉杳字士深為舍人及昭明太子薨新宮建舊人例無仕者敕特留杳焉

陳因梁制後

魏亦有之北齊典書坊置二十人隋典書坊有八人煬

帝改爲管記舍人減四員大唐復爲太子舍人四人掌侍從表啟宣行令旨分判坊事龍朔二年改爲右司議郎咸亨元年復舊○通事舍人齊中庶子屬官有通事守舍人庶子下又有內典書通事舍人二人掌宣傳令旨內外啟奏梁亦有之視南臺御史多以餘官兼職陳因之北齊門下坊有通事舍人八人至隋亦有之煬帝改爲宣令舍人八員大唐復爲通事舍人亦有八員掌引導辭見承旨勞問○左右諭德龍朔三年初置太子

左右諭德各一員掌侍從贊諭職比常侍○左右贊善大夫龍朔二年初置左贊善大夫替中允置右贊善大夫替中舍人咸亨元年中允舍人復舊而贊善大夫別自爲官左右各五人皆掌侍從翊贊比諫議大夫○崇文館學士魏文帝始置崇文觀以王肅爲祭酒其後無聞貞觀中置崇賢館有學士直學士員掌經籍圖書教授諸王屬左春坊龍朔二年改司經局爲桂坊管崇賢館而罷隸左春坊兼置文學四員司直二員司直正七

品上職爲東宮之憲司府門北向以象御史臺也其後省桂坊而崇賢又屬左春坊後沛王賢爲皇太子避其

名改爲崇文館其學士例與弘文館同○洗馬秦官漢

亦曰先馬

如淳曰前驅也國語曰勾踐親爲夫差先馬先或作洗又漢書汲黯及姊子司馬安並爲

太子洗馬安文深巧善宦四至九卿

後漢員十六人職如謁者太子出則

當直者前驅導威儀也

漢選郎中補

安帝時太子謁廟洗馬

高山冠非乘從時著小冠魏因之晉有八人職如謁者

准祕書郎進賢一梁冠黑介幘絳朝服掌圖籍釋奠講

經則掌其事餘與後漢同

晉江統爲洗馬太子頗好遊宴或闕朝侍統以五事諫之

又陸機鄧攸傳咸並爲洗馬又衛玠爲洗馬

宋與晉同齊置一人梁有典經

局又置八人掌文翰尤爲清選皆取甲族有才名者爲

之位視通直郎

梁庾於陵拜洗馬舍人如舊東宮屬通爲清選洗馬掌文翰尤其清者近代用

人皆取甲族有才名者時於陵周捨並擢充斯職武帝曰官以人而清豈限於甲族時論美之陳因之

北齊典經坊洗馬二人隋曰司經局置洗馬四人煬帝

減二人大唐司經局洗馬二人龍朔二年改洗馬爲司

經大夫三年改司經局爲桂坊

一云析司經局置桂坊

司經大夫

通判坊事罷隸左春坊咸亨初復舊掌侍奉及經史圖籍判局事。文學漢時郡及王國並有文學而東宮無聞魏武置太子文學

魏武爲丞相以司馬宣王爲文學掾甚爲世子所親信

自後

並無至後周建德三年太子文學十人後省龍朔三年

置太子文學四員屬桂坊桂坊廢而屬司經開元中定

制爲三員掌侍奉分掌四部書判書功事。校書宋孝

建中洗馬有校書吏四人自後無聞北齊有太子校書

隋太子校書有六人大唐四人掌讐校經籍

無卽字初弘文崇文

二館置讐校開元六年省讐校
置校書弘文四員崇文二員

○正字隋太子正字二

員煬帝改爲正書大唐復爲正字亦置二人掌刊正文字
○典膳郎漢魏以來並有太子食官局至北齊門下坊始別置典膳局有監丞各二人隋如北齊之制大唐典膳局有郎二人丞二人郎掌進膳嘗食之事丞貳之

乾封元年皇太子久在內不出典膳丞邢文偉請減膳上啟曰竊見禮大戴記曰太子既冠成人免於保傅之嚴則有司過之史撤膳之宰史之義不得不書過不書則死之宰之義不得不撤膳不撤則死之近代以來未甚談議不按謁見常三朝之後但與內人獨居何由發揮聖智使睿哲文明者乎今史雖闕官宰當奉職忝備

所司不敢逃死謹守禮經遽申減膳其年右史闕宰臣進擬數人高宗曰邢文偉嫌我兒不讀書不肯與肉啐此人甚直可用遂拜焉

○藥藏郎北齊門下坊領藥藏局有監丞

各二人侍藥四人隋如北齊之制大唐藥藏局有郎二人丞二人郎掌和劑醫藥之事丞貳之○內直郎齊有太子內直兵局內直兵史二人梁有直內主璽主衣扶侍等局各置有司以丞其事陳因之北齊門下坊領殿內局有內直監二人副監四人隋如北齊制大唐內直局有郎二人丞二人掌符璽繖扇几案衣服之事丞貳

之○典設郎南齊置居局齋庫丞一人梁齋內局各置有司以丞其事陳因之北齊門下坊有齋師局有太子齋師內閣師各二人隋如北齊制大唐典設局有郎四人掌凡大祭祀湯沐灑掃鋪陳之事○宮門郎秦有太

子門大夫漢因之員二人

漢官儀曰門大夫選四府掾屬

職比郎將

漢官

儀曰安帝時太子謁廟門大夫乘從冠兩梁冠

魏因之晉太子門大夫准公車

令掌通牋表及宮門禁防宋因之梁代視謁者僕射陳因之北齊謂之門大夫坊并統伶官隋煬帝改門大夫

爲宮門監大唐初爲宮門大夫今門宮局有監郎二人
丞二人郎掌東宮殿門管鑰及啟閉之事丞貳之

太子家令

丞署

主簿

食官署

典倉署

司藏

家令秦官屬詹事

服虔曰太子稱家故曰家令

漢因之有丞

鼂錯爲太子家

令以奇辯得幸太子太子家號爲智囊疏受亦爲太子家令

主倉穀飲食職似司農

少府漢代太子食湯沐邑十縣家令主之後漢則屬少
傅主食穀飲食魏因之晉又兼主刑獄穀貨飲食職比
廷尉司農少府其家令率更令及僕爲太子三卿太康

八年進品與中庶子二率同自漢至晉家令在率更下
宋則居上銅印墨綬進賢兩梁冠絳朝服主內茵褥牀
几諸供中之物及官奴婢月用錢庫內鹽米車牛刑獄
齊因之自宋齊以來清流者不爲之

沈約為齊文惠太子家令

至梁

天監六年武帝以三卿陵替乃詔革選家令視常侍黃
門陳因之後魏亦曰三卿北齊家令有功曹主簿領食
官典倉司藏等三署及領內坊令丞隋掌刑法食膳倉
庫奴婢等煬帝改爲司府令大唐復爲家令寺置家令

一人唯不主刑法餘與隋同龍朔二年改家令寺爲宮
府寺家令爲宮府大夫咸亨初復舊丞二人主簿一人
領食官署典倉署司藏署署令各一人丞各二人○丞
漢家令有丞後無聞宋書云家令丞一人晉置宋齊以
後並有之後周無隋家令丞二人大唐因之龍朔二年
改爲宮府丞咸亨元年復舊掌判寺事○主簿晉家令
有主簿宋齊因之自後無北齊家令有主簿員隋亦然
大唐因之掌印并及勾舉○食官署令丞漢詹事屬官

有食官令長丞後漢亦有而屬少傅主飲食晉太子食官令職如太官令宋則屬中庶子齊則屬詹事掌厨膳之事梁食官局屬庶子陳因之後魏亦有北齊有食官令丞又別領器局酒局二丞隋家令寺統食官令丞令一人丞二人大唐因之掌飲膳之事○典倉署令後漢太子倉令屬少傅主倉穀魏以下無聞後魏有之北齊家令寺領典倉署令丞典倉署又別領園丞隋家令寺統典倉令丞令一人丞二人大唐因之掌穀藏出納及

醢醢庶羞之事。○司藏署令。晉家令有主物吏四人。梁有錫賜庫局丞。庶子又有東宮衛庫丞。北齊家令寺領司藏署令丞。司藏又別領仗庫典作二局。丞隋家令統司藏署令一人。丞二人大唐因之。掌藏庫財貨營繕之事。

太子率更令

丞

主簿

率更令秦官

顏師古曰掌知漏刻故曰率更

漢因之有丞主簿庶子舍

人更直職似光祿勳而屬詹事後漢因之後屬少傅魏

因之晉主宮殿門戶及賞罰事職如光祿勳衛尉而屬
詹事宋制銅印墨綬進賢兩梁冠絳朝服梁陳後魏並
有之北齊領中盾署掌周衛禁防漏刺鐘鼓亦屬詹事
隋掌伎樂漏刻有令丞錄事各一人大唐因之加掌皇
族次序及刑法事龍朔二年改率更寺爲司更寺改令
爲大夫咸亨初復舊丞主簿各一人○丞後漢率更置
丞一人歷代悉有唯後周無大唐因隋掌判禮樂刑罰
之事○主簿晉置一人宋無齊有之自後無聞北齊隋

又有之大唐因之掌印及勾舉

太子僕

丞

主簿

廐牧署

僕秦官漢因之又有長丞主車馬

又有太子廐長一人亦主車馬

後漢

因之而屬少傅職如太僕太子五日一朝其非太子朝

日即與中允入問起居魏因之晉主輿馬兼主親族如

太僕宗正從駕乘安車次家令而屬詹事宋齊並有之

梁視黃門郎陳因之後魏亦有北齊詹事領僕寺置令

丞功曹主簿領廐牧署令隋僕寺置僕一人掌皇族親

疎車輿騎乘領廐牧署令大唐因之加掌儀仗喪葬而不掌親族龍朔二年改僕寺爲馭僕寺改僕爲大夫咸亨初復舊丞主簿各一人統廐牧署○丞梁有之陳因之後魏北齊隋並有之大唐因之○主簿晉置宋無齊有之梁陳後魏無北齊隋皆有之大唐因之○廐牧署令丞漢有太子廐長丞屬詹事後漢亦有而屬少傅主車馬魏晉因之齊東宮屬有內廐局外廐局皆有丞梁陳因之後魏有之北齊則曰廐牧署令丞車輿局丞隋

僕寺統廐牧署令丞大唐因之掌車馬閑廐牧畜之事

左右衛率府

副率以下官屬

衛率府秦官漢因之屬詹事後漢主門衛徼循衛士而屬少傅魏因之晉武帝建東宮置衛率初曰中衛率太始五年分爲左右衛率各領一軍惠帝時愍懷太子在

東宮又加前後二衛率

晉志曰凡太子出前衛率導在前黃麾左右二率從使導輿車

後衛率從在烏皮外並帶戟執刀其服並視左右衛將軍山公啟事曰太子左率缺侍衛威重宜得其才無疾患者城陽太守石崇忠篤有文武河東太守焦勝清貞著信義皆其選也劉卞爲愍懷太子左率知賈后必害

太子乃問張華華曰君欲如何卞曰東宮雋人如林四率精兵萬人公居阿衡之任若得公命皇太子因朝使錄尚書事廢賈后於金墉兩黃門力耳華曰廢立大事恒懼禍甚又非所能賈后微聞遷卞爲雍州刺史卞恐終露乃服藥卒

成都王穎爲太弟又置中衛率是爲五率及江

左省前後率孝武太元中又置宋齊止署左右二率

齊沈

約爲太子右率又徐孝嗣自吏部尚書轉領太子右率臺閣事多以委之沈文季亦嘗爲此官

梁二率

視御史中丞銅印墨綬武冠絳朝服左率領七營右率

領四營陳有二率後魏曰左右衛率北齊謂之左右衛

率坊後周東宮有司戎司武司衛等員隋曰左右率兼

有副率二人

文帝以太子勇預知時政欲重宮官之資故以大臣領其職蘇孝慈自兵部尚書拜

右衛率尚書如故上將廢太子憚其在東宮乃出爲湘州刺史煬帝改左右衛率爲左

右侍率兼置副率二人大唐爲左右衛率府龍朔二年

改其府爲左右典戎衛咸亨元年復舊置率各一人領

兵宿衛督攝隊伍總判府事

李靖爲中書令行左衛率轉兵部尚書

○副

率二人

掌貳率事

長史各一人隋置大唐因之掌通判自長

史以下胄曹以上率府並同○錄事參軍各一人隋置

大唐因之掌勾稽監印○倉曹參軍各一人隋置大唐

因之掌官員假使儀式糧廩膳羞田園公廨過所監藥等事○兵曹叅軍各一人隋置大唐因之掌府內衛士以上名帳差科及公私馬驢等○冑曹叅軍各一人隋置爲鎧曹大唐長安中改爲冑曹叅軍神龍初復爲鎧曹太極中復爲冑曹掌軍器儀仗公廨營造罪罰長史以下官局所領職務諸率府並同○親府勳府翊府中郎將各一人梁左右衛率共領十一營二率各領殿中將軍十人員外將軍十人北齊左右衛坊率各領騎官

脩身員外又有內直脩身正副都督隋左右衛率下直
閤四人直寢八人直齋直後各十人大唐則曰親勲翊
三府各置中郎將左右郎將各一人大唐置錄事兵曹
參軍各一人

左右司禦率府

隋文帝置左右宗衛其官制如左右衛各掌以皇族侍
衛煬帝改爲左右武侍率大唐復爲左右宗衛率府龍
朔二年改爲左右司禦衛後改衛爲率府焉神龍初復

爲宗衛景雲二年復爲司禦率府置率各一人所掌與
左右衛率同副率以下職亦同他准此副率二人長史錄事及倉兵
曹叅軍各一人

左右清道率府

隋有左右虞候各置開府一人掌斥候伺姦非長史以
下如左右衛煬帝改開府爲左右虞候并置副率二人
大唐爲左右虞候率府職擬左右金吾龍朔二年改爲
左右清道衛神龍初又爲虞候率府開元初爲清道率

府各置率一人掌斥候道路先驅後殿伺察姦非副率二人長史錄事及倉兵曹叅軍各一人

左右監門率府

隋左右監門率各置一人掌諸門禁煬帝改爲監門將軍大唐復爲左右監門率擬左右監門龍朔二年改爲左右崇掖衛咸亨初復舊垂拱中改爲鶴禁衛神龍初復舊各置率一人掌門禁凡財物出有籍副率二人長史錄事叅軍及兵曹二曹叅軍各一人

左右內率府

隋置左右率副率各一人掌領脩身以上

所領千牛以下與千牛衛

同

禁內侍衛供奉兵仗大唐爲左右內率府龍朔二年

改爲左右奉裕衛咸亨初復舊各置率一人掌侍衛左

右供奉兵仗副率長史錄事參軍及兵曹各一人千牛

各十六人掌執細刀弓箭宿衛侍從脩身各二十八人

掌宿衛侍從龍朔二年改太子左右千牛脩身爲太子

左右奉裕尋復舊

太子旅賁中郎將

旅賁中郎將一人職如武賁中郎將宋初置天子有武賁習武訓也諸侯有旅賁禦災害也大唐諸率府初有中郎郎將官永徽元年以太子名忠改諸率府中郎將爲旅賁郎將其郎將改爲翊軍後或改或省

太孫官屬附

大唐永淳元年三月立皇孫重照爲皇太孫將置府寮高宗召吏部郎中王方慶問曰前代故事如何方慶進

曰臣按周禮有嫡孫漢魏以來皇太子在亦不立太孫
晉惠帝永寧元年立愍懷太子第三子襄陽王尚爲皇
太孫太子官屬即轉爲太孫官屬南齊永明十年立文
惠太子長子南郡王昭業爲皇太孫便居東宮今皇太
子在而立太孫旁求載籍未有前例上曰自我作古可
乎對曰五帝不相沿樂苟不失上下之序不虧政理之
道亦何事而不可詩曰貽厥孫謀以燕翼子禮曰君子
抱孫不抱子孫可以爲王父尸以其昭穆同也今陛下

肇建皇孫創斯盛典所以彰子孫千億之盛福祚靈長之應也上悅使方慶詳求典故官屬員品乃奏太孫府置師傅友文學祭酒及長史曹掾主簿管記司錄以下六曹從事等官各加王府一級上後頗以爲疑竟不補授而止

通典卷三十